

## कोरिन्थीरालाई

### पावलए उस०कताव परींद ओरायो चिथी

आव चिथी कोरिन्थलाव मन्दलीए जूनी पावलए ओसरो ज़। नो पो अखैया खन्दलाव बनै उमिन थासो सहर ओल्यो। नल प्राइँनिकाव मिँर दुप्सिहुद यामन लागिउ येन ज़ यादोज़्याव। परमेस्वरए उमिनतावराए मनी निताव माचाव येनर दाद (१ कोरिन्थी ५:१-६:२०), ज़न या याल माखैद इंसिउ ज़ लिज़्यार दी लिन्या पावलए ओथैज़्याव (१:११; ३:३)। है जैद नोर बलेसूर्या लिद ननी जोगोइन्याए जूनी नोरालाई सिडार्द (४:१४-१७), मन्दली कितावनी चलैन्त्या लिद (११:२-१४:४०) परमेस्वरए उमिनत पाथ ओरापारैव सरैःसिउ लिज़्या।

<sup>1</sup>परमेस्वरए ओखतैनाव येसु ख्रीसए ओसाची डा पावल सोनो डास लिज़्याव गेभाइ सोस्थेनेसस गिन्ल्योनी, <sup>2</sup>जे कोरिन्थलाव परमेस्वरए ओमन्दलीलाई आव चिथी परींद गिन्त्याचिज़्या। जे प्राइँडाव गेप्रभु येसु ख्रीसए उमिन हाइज़्यावरास जे ब येसु ख्रीसनिकाव छैव तान्या खुल्सिउर जेलिज़्या। <sup>3</sup>परमेस्वर गेबाबु सोनो गेप्रभु येसु ख्रीसनी जेल्योदा नियुँ गराँद जेयुँ होलाँ जैद ओयाचिरक।

#### परमेस्वरलाई धन्याबाद

<sup>4</sup>जे येसु ख्रीसनिकाव परमेस्वरए ओअसिकर जेदैवए डा जेजूनी परमेस्वरलाई एकमन्या धन्याबाद चरैःव ज़ डानैज़्या। <sup>5</sup>जे पाँल तादी ब, ग्यानल तादी ब ख्रीसनी प्राइँनी ज़ बनिउर ताद जेले। <sup>6</sup>ननी ज़ जेलाई गेसथैचिउ ख्रीसए ओपाँर जे जेक्याँत थ०रिके। <sup>7</sup>है जैद ज़ गेप्रभु येसु ख्रीस ओमाहुवा पै जेयुँ थू जैद कींद जेनेज़्याव भरिल, ओल ओयेन दान्यात प्राइँ बरदानर जोरैद नैद्याचिउ, कातानी ब कम्ती जेमाले। <sup>8</sup>है जैद गेप्रभु येसु ख्रीस उहुन्या छचाम पै

ओल परमेस्वरए ज़ जेलाई थरिउर जेखत माल्योर नैचिरिज़्याव।  
 9 निताव येनल परमेस्वरलाई युँ हुबो ज़ लिज़्या। ओज़ा गेप्रभु येसु  
 ख्रीसस सिप लिन्या खुल्द नैचिउ।

### माखैन्या पाँर

10अ डानैं डामेर, गेप्रभु येसु ख्रीसए उमिननी डाअर्थेचिज़्या, जे जेल  
 सु ज़ माखैव ताताक, बुरू प्राइँ तयुँ जैद खैद लिच्यो। 11 खाली आड  
 ते झन जे इंसिउ ज़ जेलिज़्या दी लिन्या क्लोयए उझिमलावराए  
 ल्योनी डाथैके। 12 डा है डालिज़्याव आव ज़, ख्वाराए 'गे  
 पावलसकावर', ख्वाराए 'गे अपोल्लोससकावर', ख्वाराए 'गे  
 पत्रुससकावर', ख्वाराए 'गे ख्रीससकावर' है जेलिज़्या दी। 13 काता  
 ख्रीस चिरासिउ उलिज़्याव रो? सैं डा पावल कुसत तङ्गिसिद डाजिउ  
 झाःद डायचिउ रो? सैं डा डामिनत सछैंसिउर ब यालिज़्याव रो?  
 14 परमेस्वरलाई धन्याबाद लिज़्या, जे जेल्योडाव डानिसछैवनी  
 क्रिस्पस सोनो गायसनी वाज़ लिज़्यानी। नो नेब्लोकिन छुतर  
 डामारासछैवए, 15 डा डामिनत गेसछैंसिके लिन्या सुए ज़ है  
 ल्यो दैन्या जेमाले। 16 ओहो, स्तिफनासए उझिमलावरालाई पाला  
 डारासछैव ज़। नोकिन छुतर ते डामारासछैखेहो लिन्या मिताव  
 डाड्मसिज़्या। 17 ख्रीसए डालाई मिँर सछैँन्याए जूँनी उपरीनाव  
 माःक, चाव था सथैन्याए जूँनी उपरीनाव ची। नो पाँ डारासथैक  
 येसु ख्रीस कुसत उसिउ पाँए ओअर्थ ताम्नाक लिद बनै मोहोन्यालो  
 जैद डामापाँए, किताव उलिज़्याव हिताव ज़ डापाँज़्या।

### ख्रीस उसिउ ओलेखा ल्यो ज़

18ख्रीस कुसत उसिउ पाँ नर्गलाव येमदा बाज़्यावरालाई ओलेखा  
 माल्यो पाँ मिताव ज़ लिज़्या। खाली गे अजम्बरी जुनीदा  
 बाज़्यावरालाई ते नो पाँत परमेस्वरए ओसक्ती लिज़्या। 19 काराव  
 ल्यो ताकिन धर्मसास्त्रल इताव सर्सिउ लिज़्या,  
 “बनै सैन्याराए यापाँ ओअर्थ माल्यो अन्नाकलाव ज़ डाजैरिज़्या।

ओगहक ल्यो मिएँ ओगहक ब पल्लतैद डाएरिज्या।”

20 यागहक ल्योर खैकी? सासूत्रीर सोनो आव जुकलाव सैन्यार काङ्गु यालिङ्ग्याव? ओल परमेस्वरए ज़ आव मानुवातावराए याबुद्धी अनाकलाव ज़ जैद याएक्यो। 21 परमेस्वरए डादाकिन ज़ अचम्बलाव ओगोइँनी आव मानुवाताव मिँरालाई या याबुद्धीनी यागहकनी ओललाई मासरेसुधुन्या याजैक्यो। बुरू गे गेरासथैङ्ग्याव आव मानुवाताव मिँराए ओअर्थ माल्यो याथरैव पाँनी ज़ इन यायुँ हुपूज्यावरालाई परमेस्वरए अजम्बरी जुनी यान्या थरैक्यो। 22 यहूदीराए ते परमेस्वरए ओराज्यालाव सरैसर आव मानुवात यामारँ:वा पै यायुँ ओमाहुपूज्याव। ग्रीकराए फरी बुद्धीलाव पाँ याखिमङ्ग्याव। 23 गे ते ख्रीस क्रुसत उसिउ पाँ गेरासथैङ्ग्या। नो पाँए यहूदीरालाई यायुँ के:द याएज्याव, ग्रीकरालाई फरी ओअर्थ माल्यो ल०न्या मिताव पाँ ज़ लिङ्ग्या। 24 परमेस्वरए ओराछाँतिउरालाई ते, यहूदीर तादी ब, ग्रीकर तादी ब, ख्रीसए ओक्याँत परमेस्वरए ओसक्ती ब लिङ्ग्या, उबुद्धी ब लिङ्ग्या। 25 काराव ल्यो ताकिन परमेस्वरए ओयेन मुख मिताव ओरै:दी ब मिँराए यागहकनी यादोज्याव येनकिन ओलेखा ल्यो लिङ्ग्या। नत ओसक्ती माल्यो हार्या मिताव ओजैसिदी ब मिँराए यासाँकिन परमेस्वरए ओसक्ती नत ज़ रै:के।

परमेस्वरए जिमज़ारालाई ओराछाँतिउ

26 जे ब जेसैङ्ग्या डानैँ डामेर, जे परमेस्वरए उखुल्चिउ बेलाक मिँराए लेखानी जेबुद्धी ल्योर कोसै जेमाले, घेप्पा मिँर ब कोसै जेमाले, घेप्पा जातलावर ब कोसै जेमाले। 27 ननी ज़ रै:ङ्ग्या, परमेस्वरए आव मानुवाताव बनै सैन्याराए यागहक अनाकलाव जैद्यान्याए जूँनी जे मिताव कान्ल ज़ मागनिसिउरालाई

रूजिचिक्यो। घेपपा मिन दैवरालाई लाज मोर्नो जैन्याए जूनी जे मिताव ज़िम्ज़ारालाई छाँतिचिक्यो। 28 आव मानुवाताव यासघ्योःव पाँर अनाकलाव जैन्याए जूनी परमेस्वरए झन ज़िम्ज़ा, काम मालागिउ स़ोनो कान्ल ज़ मागनिसिउरालाई यारूजिक्यो। 29 है जैद परमेस्वरए ओड़ाक यानी सु ज़ सघ्योःसिधुन्या मालेर। 30 जे ब परमेस्वरनी वाज़ येसु ख्रीसस सिप ताद जेले। नोए ज़ परमेस्वरलाई सरेसून्या बुद्धी ब यासिक्यो, ओल उयुंलाव मिताव छैवर ब जैसिक्यो, माचावनी रेंःद उमीर ब जैसिक्यो। 31 है जैद धर्मसास्त्रल सर्सिउ लिज़्या,  
“जो सघ्योःसिउ पैज़्याव,  
प्रभुनी वाज़ ओसघ्योःसिक।”

## 2

किताव ओल्यो हिताव ज़ डासथैचिउ

1 डानैं डामेरं, डा डादा जेल्योड डाहुव बेलोक परमेस्वरए मोसिउलाव ओपाँ डासथैचिज़्याक बनै सैन्या मिँराए यापाँ मोहोन्यालो जैद यापाँज़्याव मितावनी डामापाँए। 2 बुरू जेल्योड माहुद ज़ येसु ख्रीसए उमिन स़ोनो क्रुसत उजिउ झाःद ओयासिउए जूनी वाज़ डारापैया है डालिज़्याव। 3 झन जेल्योड डाहुक ते डासक्तीर माल्यो ताद छेःव ज़ डालिके। 4-5 है जैद जेयुँ मिँराए याबुद्धीनी हुव पाँत ताहुपूक, परमेस्वरए ओसक्तीलाव थ०रिउ पाँत वाज़ ओताक लिद डा जेलाई परमेस्वरए ओपाँर डासथैचिक मिँराए याबुद्धीनी यारामोहोनेज़्याव मितावनी डासथैचिउ माःक। बुरू नो डापाँत परमेस्वरए उपुरूस स़ोनो ओसक्ती ओरेंःवनी वाज़ डासथैचिउ।

परमेस्वरए उपुरूसनिकाव चाव बुद्धी

६हितावत ब परमेस्वरए ओपाँत पाखो तावरालाई अचम्बलाव

बिचारनी हुव पाँर ब डारासथैजूया। खाली नो पाँर आव जुकलाव बुद्धीनी ब माःक, खेमद बान्या घेपपाराए यागहकनी ब माःक। 7 गे गेरासथैजूयाव परमेस्वरए ओपाँ ते बनै उबुद्धी ल्यो आःपै सुए ज़ यामाथरैताव कप्सिउ मिताव ज़ उलिजूयाव। खाली ओल परमेस्वरए ज़ नो पाँनी गेलाई ओज़गै मगैल लाँन्याए जूँनी नाम नम ओमाजैदकिन ज़ आव बेलाए जूँनी ज़ गोईद ओनैजूयाव। 8 आव जुकलाव घेपपाराए परमेस्वरए ओगोईनी ओदोव येन ज़न माथरैधुकेर। थरैद यासैव ताकिन ज़गै मगैव गेप्रभुलाई क्रुसत मासैःखेरहो।

9है जैद गे गेरासथैजूयाव पाँए उजूँनी धर्मसास्त्रल इताव सर्सिउ लिजूया,

“परमेस्वरए ओललाई मया दाजूयावरालाई

सुए ज़ यामारैःताव,

सुए ज़ यामाथैताव,

सुए ज़ यामासैताव पाँर सतैद याएरिजूयाव।”

10नो पाँर फरी परमेस्वरए ओल उपुरूसए ज़ सतैद्यासिक्वो। होए वाज़ पाँ भरी सैजूयाव, परमेस्वरए उयुँलाव पाँर ब सैजूयाव। 11 गे मिँर ब गेक्याँताव पुरूसए वाज़ गेयुँलाव पाँ भरी सैजूयाव। हिताव ज़ परमेस्वरए उयुँलाव ओपाँर ब ओल उपुरूसए वाज़ सैजूयाव, छुतराए मासैधुर। 12 गेलाई ओल परमेस्वरए ओयासिउ बरदानर सैव परीन्याए जूँनी उपुरूस याद नैसिउ। नो पुरूस आव मानुवाताव बुद्धी स्यासोनी माःक, परमेस्वरनी हुव ज़ लिजूया। 13 है जैद गेरासथैजूयाव भरी मिँए बुद्धीनी हुव माःक, परमेस्वरए उपुरूसए ओपैसिजूयाव वाज़ गेपाँजूया। परमेस्वरए ओपाँ ते परमेस्वरए उपुरूसनी वाज़ पलासुसिजूया। 14 परमेस्वरए उपुरूस माल्यो मिँए परमेस्वरए उपुरूसनिकाव हुव पाँ माभैःए। नोलाई ओअर्थ माल्यो

पाँ मिताव ज़ लिज़्या। नो पाँ परमेस्वरए उपुरूसनी वाज़ सैन्या ओतावए माबुझिधुव। 15 परमेस्वरए उपुरूस दैव मिँए ते पाँ भरी थरैधुज्याव। छुतराए ते नोए ओपाँलाई माथरैधुर। 16 धर्मसासत्रल ब इताव सर्सिउ लिज़्या,

“परमेस्वरए उयुंलाव पाँलाई थरैद,  
ओललाई पैधुज्याव सु ची उलिज़्याव?”

खाली गे ते ख्रीसए उयुंलाव पाँ दैवर गेलिज़्या।

### 3

#### माखैवरालाई सुधारैन्या

1अ डानै डामेर, डा जेस डालिज़्याक परमेस्वरए उपुरूस दैवरास डापाँज्याव मिताव माताके। जे ख्रीसए ओबगाललाव माछिबो भाउज़ा स्यासोर वाज़ जेलिज़्यावए मानुवाताव मिँरास पाँज्याव मिताव पाँव परिके। 2 हो बेलाक डादा ख्रीसए ओपाँ डयाचिक ज्याव माज्युताव भाउज़ारालाई नुईं याराएज्याव मितावनी ज़ डयाचिके, आ:पै ब हा:वाकावर ज़ जेलिज़्या। 3 जे जेल सोसिन्या इसिन्या वाज़ ओतावए परमेस्वरए उपुरूस मादैव अइज़काव मिँ स्यासोर ज़ जेलिज़्या। 4 जे ख्वाराए ‘डा पावलसकाव’, ख्वाराए ‘डा अपोल्लोससकाव’ है जेलिकिन निताव जेपाँए परमेस्वरए ओपाँ मादैव स्यासोर ज़ जेलिज़्या। 5 अपोल्लोस सुदा? पावल सु? गिन परमेस्वरए सु सु गिनयेनत खतैद जेलाई परमेस्वरए ओयेमदा लाँज्याव ओनोकोरनी वाज़ मा:क रो? 6 डा परमेस्वरए ओपाँत धुर वासज्याव मिताव डालिज़्या, अपोल्लोस री योज्याव मिताव लिज़्या। सपरीद्याज्याव ते ओल परमेस्वर ज़। 7 है जैद धुर वासज्याव ब काता ज़ मा:क, री योज्याव ब काता ज़ मा:क, सपरीद ओसै झा:द्याज्याव परमेस्वर वाज़ लिज़्या। 8 धुर वासज्याव सोनो री योज्यावनी निलेखा तोबो ज़। सु सु नियेनए

ओजेला दैरिजूयानी। ९ गिन परमेस्वरए ओएँःल येन दाज्याव स्यासोनी गिन्लिज्या। जे परमेस्वरए ओएँः स्यासोर जेलिज्या, परमेस्वरए ओजैज्याव झिम स्यासोर ब जेलिज्या।

10 डालाई परमेस्वरए ओखतैनाव येनत ओल ओयाँव असिकनी ज़ पाखो भुली मिताव डा उझिमलाव गज डाथालिके। होए ओतर्त छुतए चाःजूयाव, खाली होए जोगोइद ओचाःवक। 11 गज ते ताधुके — नो गज येसु खीस ज़। परमेस्वरए ओराजूयाल छुत गज माले। 12 नो गज तर्ताव याजैव सुन चाँदी तादी ब, ओएः ल्यो लुरं तादी ब, सीर छीर तादी ब, 13 परमेस्वरए फाल्नुया छचाम मिँराए यादोव येन भरी मेंःनी जाँचिनुया ले। नो यायेन चाव सैं माचाव लिनुया मेंःए ज़ सरैंःद्यानुया ले। 14 नो गज तर्ताव उरिमो येन उथःरिकिन नो मिँए इनाम दैनुया ले। 15 नो ओदोव येन फरी मेंःए ज़याद ओएकिन, ओयेन भरी अनाकलाव तानुया ले, खाली ओल ते मेंःनी पुलुसुद ओबाँचिउ मिताव ज़ तानुया ले।

16 परमेस्वरए छैँव उपुरूस जेस बास दाद नैव लिनुया जेमासैँज्याव रो? जे ते परमेस्वरए चोखो उझिम ताद जेले। 17 नो झिम छैँव ओल परमेस्वर लिनुया पो ओतावए जोए नो झिमलाई बलेःजूयाव परमेस्वरए नोलाई ब बलेःनुया ले। नो झिम जे ज़। 18 है जैद जे सु ज़ ताझुकिच्यो। जोए आव मानुवाताव याथरैव गोइँनी “डा प्राइँरानी सैँनुया डालिज्या” है उलिकिन होए ओसघ्योःसिनुया ओरासोक। हो ताकिन ची परमेस्वरनिकाव साचो बुद्धी दैव मिँ तानुया ले। 19 आव मानुवाताव बुद्धी परमेस्वरए ओड़ाक ते काता ज़ माःक। नोए उजूँनी धर्मसास्त्रल इताव सरिँउ लिज्या,  
“परमेस्वरए याबुद्धी ल्योरालाई या यापाँनी ज़ याक्योःजूयाव।”

20 फरी तोथोल,

“याबुद्धी ल्योराए याबिचार

अनाकलाव लिज्या लिन्या परमेस्वरए सैज्याव।”

21 है जैद जे मिरालाई तारासध्योःच्यो, काराव ल्यो ताकिन प्राई जेजूनी ज़ लिज्या। 22 पावल तादी ब, अपोल्लोस तादी ब, पत्रुस तादी ब, ताव भरी तादी ब, सिन्या तादी ब, बाँचिन्या तादी ब, आज्यालकाव पाँर तादी ब, हुन्या पाँर तादी ब, प्राई जेजूनी ज़ जैसिउ लिज्या। 23 जे ते ख्रीसए उमीरं ज़, ख्रीस फरी परमेस्वरए उमीं ज़।

#### 4

ख्रीसए ओसाचीर सोनो यानी सध्योःसिज्यावर

1 है जैद इतावनी जे गेलाई, “आवर ख्रीसए ओसेवा दाज्यावर, परमेस्वरए मोसिउ ओपाँ पलासज्यावर याल्यो” लिन्या सरेसो ताके। 2 सेवा दोज्यावराए यायेन, यागे परमेस्वरए है ओल्यो भरित सतस दाद उयुँ होलाँ जैद्यान्या लिज्या। 3 है जैद जे तादी ब, छुतराए तादी ब, जो मितावनी है जेदाँदी ब, जो मितावनी जेगोईनादी ब डा ग्याल गिल ज़ डामाताए। डानी ब डा इताव डालिज्या है डामालिधुइ। 4 खाली डाचेतैक परमेस्वरए ओयेन डाबलेःखेहो सा लिन्या डामासैए। हैदी ब डा है डालिज्यावनी माःक, डालाई छ्यानिन्या ओल परमेस्वर ज़ लिज्या। 5 है जैद जे ब थिक बेला ओमाहुद छुतर ताराछ्यानिच्यो। गेप्रभु फरी उहुक चुम चुमोलाव मोसिउ भरी ओज़लाँए सरैःरिज्याव, प्राई युँलाव पाँ ब सतैरिज्याव। हो छ्याम मिरालाई “चाव जेदोव ओल्यो, माचाव जेदोव ओल्यो” लिन्या ओल ज़ है दान्या ले।

6 डानै डामेरं, डा आक पै डासरोल जे अपोल्लोसस गिनलाई जेगोईसिज्यावनी गिन गिनमिन वाज़ हाइद डानै। ननी ज़ जे गिनलाई रँःद डा है डालिज्याव धर्मसासत्रलाव पाँर याका जेदोकिन जे जेल सुए उमिनत ज़ सन्द सध्योःसिन्या जेमाले। 7 जे छुतए



उमिननी नैं मेंराकिन कै जैद चाव जेलिजूयाव? जेसकाव लिजूयाव भरी परमेस्वरए ल्योनी अइज्ज जेदैव माःक रो? है जैद जे काराव मादैवराए मिताव जैसिद जेस०जूयाव? 8 जे, “गेस प्राईं ज़ उलिजूयावए धनी ताद परमेस्वरए ओराजूयालाव राजा ताद गेले,” है जेलिजूया दी। इताव जेपाँए ते गिनलाई अपोल्लोसस ब बलेंद जेबाधुव ची ओल्यो! जे साचो निताव ज़ जेताव ताकिन ते तान्या ओल्यो। गिन ब जेस राजा तान्या गिन्ल्यो! 9 खाली चिऊक ते गे परमेस्वरए ओसाची खतैसिउर प्राईंरानी छींताव सिन्या सजा दैव स्यासोर गेरैःजूया। नो गेलिजूयाव सजाल आव मानुवाताव मिंराए याड़ाक सोनो परमेस्वरए ओचाकर्याराए याड़ाक चिऊसी निन्या मितावर ताद गेले। 10 गे ख्रीसए उजूनी बरेःसी निन्यार ताद गेले, जे ते ख्रीसए उमिनत बधा घ्योःवर ताद जेले। गे कान्ल ज़ मागनिसिउ मितावर ताद गेले, जे ते घेप्पा मिन खिमन्यार वाज़ ताद जेले। गे मिंराए डाक पैक्यार ताद गेले, जे ते मान दैव स्यासोर जेजैसिजूया। 11 आख मनी ज़्यान्या ओन्याए माथैद, करे करे थाकना बुरूम ज़ गेबारिजूया, लिन्या गेझिम ब माले, मुत्का लप्ता ब कैव ज़ गेनैजूया। 12 परमेस्वरए ओपाँ गेरासथैक ब गेकुइए येन दाद गेडासिके। गेलाई थलजूयावरालाई असिक गेराएजूया, गेखिरी यापसिक ब गेसहिजूया, 13 गेमिन बलेःद्याजूयावरालाई ब चावनी ज़ गेरापजैजूया। गे आःपै मानुवातावराए याड़ाक कान्ल ज़ मागनिसिउ, युँ माजामो झिम्सी स्यासोर ताद गेले।

पावल याबाबु मिताव ज़

14 आव डासरो भरी जेलाई लाज मोर्नो जैन्याए जूनी माःक, याबाबुए उयुँलाव ओज़ारालाई ओरामःलैजूयाव मितावनी तखेप डासिडाचिके। 15 काराव ल्यो ताकिन जेलाई ख्रीसए ओपाँ पैजूयावर बनै कुधु ज़ यालिदी ब जेबाबु ते तोबो ज़ लिजूया। जेलाई येसु ख्रीसए ओपाँ डासथैचिउए डा ज़ जेबाबु मिताव डाताके।

16 है जैद जेलाई है डादाचिज्ञया, डा डादोज्ञयाव मिताव जे मनी दोच्यो। 17 आवए उजूनी ज़ तिमोथीलाई जेल्योदा परींद डानै। नो मिँ परमेस्वरए ओपाँत डायुँ हुबो डायुँलाव डाजा मिताव ज़ लिज्ञया। नोए डा पो पोडाव मन्दलीरालाई डारापैज्ञयाव मिताव येसु ख्रीसए उमिनताव चलन दान्या जेलाई ब पैचिरिज्ञयाव।

18 ख्वा ख्वार ते डा जेल्योड खर्क ज़ माहुन्या मिताव डम्सिद बनै स०ज्ञार दी। 19 हैदी ब गेप्रभुए उयुँ ओताकिन डा हतपूत ज़ जेल्योदा डाहुरिज्ञया। हो ताकिन नो स०ज्ञयावर याया: वाज्र सैं साचो यासक्ती ब उलिज्ञयाव रँ:न्या डाले। 20 परमेस्वरए ओराज्ञयालाव मिँर तान्या या:ए वाज्र मा:क, परमेस्वरए ओसक्तीनी दान्या मनी ज़। 21 है जैद डा जेल्योदा डाहुक झुइस हुन्या सैं मया रैद चावस हुन्या जे ज़ सैंच्यो।

## 5

याखालाव युँ माजामो येन

1 जे जेखाल तोबो बनै युँ माजामो माचाव येन ताद ले दी लिन्या प्राइँदा ज़ थासूद ले। निताव येन परमेस्वरए ओपाँ मादैवराए खाल ब माले। जेनी तोबोए ओबाबुए कान्छी ओज्ञयालाई लाँद होस लिज्ञयानी दी लिन्या डाथैज्ञया। 2 जेखाल निताव येन लिज्ञयावत ब जे कै जैद स०द जेसघ्यो:सिज्ञयाव? बुरू जेयुँ माचाव दाद नो मिँलाई जेखानी पले:न्या ओल्यो। 3 डाक्याँ जेल्योड ओमालिदी ब डायुँ ते जेस ज़ लिज्ञया। है जैद डा जेल्योड डालिज्ञयाव मिताव नो मिँए ओयेन डाफाल्धुके। 4 जे गेप्रभु येसुए उमिनत जेदुप्सिक, डा ब गेप्रभु येसुए ओसक्तीस जेखाल ज़ डालिज्ञयाव सम्जिद, 5 जे नो मिँलाई सैतानए उकुइत सँपिचिके। हो ताकिन युँ माजामो ओयेनरानी निताव दुखर सहिद गेप्रभुए फाल्न्या छचाम कसा उपरूस माबाँचिए।

6जे काताए जूनी सध्योःसिन्या? मुछिसिउ कनेल तकेज़ा सोगोइन्या वासः झाःकिन कने भरी सरालिज़्याव लिन्या जेमासैए रो? 7 जे पुराँदो सरालिज़्याव वासःलाई हाइद ख्याव ताके। स्त्रीसए निस्तार पर्व छचामकाव पाथा जैसिद उजिउ झाःद ओयासिउए जेखत माल्यो साःरोर जेताज़्या। 8 है जैद जे नो पर्व चावस मानिन्याए जूनी जेखालाव पुराँदो सरालिज़्याव वासः मिताव जेयुँलाव पापर, बलेन्त्या येनर ख्याद साःरो छैव युँनी सतस दोव ताके।

9डादाडाव डापरीव चिथील, जे पातर्या पातर्नी जैसिज़्यावरास खदेप तालिच्यो लिद डासरो। 10 नो है डाल्यो आव मानुवाताव लुभीर, धुतैद ज़्याज़्यावर, अडग्या पुजा दाज़्यावरालाई माःक। नोराए ल्योनी पुलुसन्त्या ताकिन आव मानुवाताव प्राइँ मिँरानी ब अछतड ल्यो परिखेहो। 11 खास है डादाचिउ ते आव ची, जेसकाव यायुँ हुबो जैसिज़्यावर पातर्या पातर्नी जैसिज़्यावर, मँःए मँःए बारिज़्यावर, अडग्या पुजा दोज़्यावर, थलज़्यावर, लुभीर, धुतैद ज़्याज़्यावर यालिकिन, नितावरास सिप ब तालिच्यो, सिप ब ताज़्युच्यो। 12 गेकिन पाखाडावराए यायेन फालन्त्या गे माःक। गे गेराजाँचिज़्यावर ते गेसकावरालाई वाज़। 13 है जैद, “नो माचाव येन दोवलाई जेखानी हाइचिके।” पाखाडावराए यायेन फालन्त्या ते ओल परमेस्वर ज़ लिज़्या।

## 6

### मुद्दा माझाःन्या

1जे जेल नैं मँस माखैव पाँर ओताक कै जैद परमेस्वरए उमिनताव मिँरालाई फालो मापरींद एकसब्द्या अदालतड जेबाज़्याव? 2 काता जे परमेस्वरए उमिनतावराए तछा मानुवाताव मिँरालाई याराफाल्रिज़्यार लिन्या जेमासैए रो? मानुवाताव पाँर तछा जेनी ओफाल्रिसिकिन कै जैद इताव जेखालाव तकेज़ा पाँर

जेमाफ्याःधुज्याव? 3 हो बेलाक फरी परमेस्वरए ओचाकर्याराए यायेन ब गेफालरिज्या। झन आव गेजितताव पाँर कै जैद माफाल्न्या? 4 इताव फाल्न्या पाँर जेखाल उहुक काराव मन्दलीए कान्ल ज़ ओमारागनितरालाई फालो परीन्या? 5 इताव पाँत जेलाज माहुज्या? जे जेल जेपाँ फाल्धुन्याकावर तोबो ब जेमालिज्याव रो? 6 झन जे नै मेंरालाई परमेस्वरलाई यायुँ माहुबोराए ल्योक लाँद मुद्दा ब जेझाःनाज्या। 7 खास दाद जे जेल मुद्दा जेझाःसिकिन हो ब लाज मोर्नो ज़ लिज्या। बुरू नितान माखैन्या पाँर गाल्द कोरलैर जेसहिकिन तान्या ओल्यो। 8 जे ते झन जेनै मेंराए क्यौत ज़ लाँप चोप दाद अन्याय जेदोज्या।

9 अधर्मीर परमेस्वरए ओराज्याल माबाधुर लिन्या जेमासैए रो? है जैद जे ताझुकिच्यो, नो अधर्मीर इतावर ज़ – पातर्या पातर्नीर, अङ्ग्या पुजा दोज्यावर, अर्काए ओज्या रैज्यावर, खेपा-खेपास मेंमा-मेंमास पातर्या पातर्नी जैसिज्यावर, 10 कुज्यावर, लुभीर, मँःए मँःए बारिज्यावर, थल्ज्यावर, धुतैद ज्याज्यावर, आव भरी परमेस्वरए ओराज्याल बाधुन्या मालेर। 11 जे ब ख्वा ख्वा रितान ज़ जेल्यो। आज्याल ते नो भरिनी परमेस्वरए छेद छैँवर जैद नैचिउ। झन गेप्रभु येसु ख्रीसए उमिननी सोनो परमेस्वरए उपुरूसनी जेखत माल्योर थ०रिद जेले।

### गेक्याँ कोभा येनए उज्जनी माःक

12 जे ख्वा रार है जेलिज्याखेहो, “गेलाई कानुननी वैसिउ येन काता ज़ माले।” हैदी ब डा फरी जेलाई है डादाचिज्या, प्राई येन क्यौँए ज्जनी माले। डाकुइत प्राई येन उलिदी ब डा कोभा येनए ओबाँदा डामाताए। 13 जे ते झन है जेलिज्या, “ज्याव भरी फूए उज्जनी जैसिउ लिज्या, फू ब ज्यावए उज्जनी जैसिउ लिज्या।” खाली डा ते है डालिज्या, परमेस्वरए नेथोलाई ज़ खेमन्या ले। गेक्याँ युँ माजामो

येनए जूनी माःक, प्रभुए जूनी ची। फरी गेलाई चाहिज्याव भरी प्रभुए ओल ज़ जोरैद यासिज्याव। 14 परमेस्वरए गेप्रभुलाई किताव सिउनी ओसोचोइव, गेलाई ब नो ओसत्कीनी ज़ तछा अजम्बरी जुनील सोचोइसिरिज्याव। 15 जे जेक्याँ ख्रीसए उखँ कुइर ताद लेर लिन्या आःपै जेमासैए रो? हिताव ताकिन ख्रीसए ओक्याँ काराव पातर्नी मेंमाए ल्योदा लाँन्या? निताव सुए ज़ तादोवक। 16 जो पातर्नी मेंमास बाजूया हो पातर्नीस तक्याँल ज़ गनिसिज्यानी सानी। धर्मसास्त्रल ब नितावए उजूनी अइ लिद सर्सिउ लिज्या — “जूया-री तावनी तक्याँ ज़ ताजूयानी।” 17 खाली जो मिँ परमेस्वरए ल्योदा जोरैसिज्या, नो परमेस्वरस तपुरूस ताजूया।

18 पातर्या पातर्नी जैसिन्यानी अछतड ल्यो ताके। उपुर्काव पाप भरी ते क्यौंकिन पाखाड ज़ ताजूया। पातर्या पातर्नी जैसिज्यावए ते ओल उउपर्त ज़ पाप दोज्याव। 19 आव गेक्याँ परमेस्वरए छैव उपुरूसए उझिम लिन्या जेमासैए रो? नो परमेस्वरए ल्योनी गेदैव छैव पुरूसए गेक्याँत बास दाद नैव। है जैद आव गेक्याँ गे गेमीं माःक, 20 गेलाई परमेस्वरए गेएः फोःद्याद उलँःसिउर ची। है जैद गे आव गेक्याँ परमेस्वरए उमिन सरैःद्याव ताके।

## 7

### जूया-रीलाव पाँर

1 अब ते डालाई परींद जेयाँव चिथीनी तोबो तोबोनी है डादाचिजूया। खेपाए ज़्या मादान्या चाव ज़ लिजूया। 2 खाली पातर्या पातर्नी जैसिद बलेसून्या ओताजूयाव देखा बुरू खेपाए ज़्या ओदोवक, मेंमाए रे ओदोवक। 3 ज़्या-री नितावत फरी खेपाए ओजूयालाई अछतड तानैवक, मेंमा ब ओरेकिन अछतड तालिक। 4 ओजूयाए ओक्याँ ओल उजूनी वाज़ माःक, ओरेए उजूनी मनी ज़। ओरेए ओक्याँ ब ओल उजूनी वाज़ माःक, ओजूयाए उजूनी मनी ज़।

5 मेंमाए ओरेलाई ओल्योदा हुन्या तावैवक, खेपाए ब ओज्यालाई ओल्योदा हुन्या तावैवक। खाली परमेस्वरलाई पोंखारिन्याए जूनी जाँवा पै बातड बातड लिन्या निसखैदी ब निताव एकतार माःक, फरी सिप उलिनिक। निमालिकिन तोबोए उयुँ ओमानैधुकिन सैतानए बलेव पैवा। 6 आव है डादाचिउ पाँ मादाद माताए है डालिज्याव ते माःक, खाली इतावनी ताए सैं है डालिज्या। 7 डा है डालिज्याव मिताव ताकिन ते प्राइँ डा मिताव ज्या मादोवर याताकिन चाव ताखेहो। खाली परमेस्वरए प्राइँलाई छुत छुत किसिमलाव येन दान्या बरदान याद नैसिउ, ख्वारालाई किताव, ख्वारालाई किताव।

### बिह्या दान्या

8 ज्या मादावर सोनो रे मादावर, याज्या सिउर सोनो यारे सिउराए जूनी है डालिज्या, डा स्यासो बातड लिधुकिन ते चाव ज़। 9 खाली उयुँ ओमानैधुकिन बिह्या ओदोवक। युँ झम माते-धुज्याव देखा ज्या दान्या, रे दान्या ज़ पाथ लिज्या। 10 फरी ज्या दावर सोनो रे दावराए जूनी आव है डालिज्याव पाँ डानी वाज़ माःक, गेप्रभुए है ओल्यो पाँ मनी ज़, रे दाव मेंमाए ओरेलाई ख्यानैद ताबाक। 11 ख्यानैद ओबाकिन छुत रे मादाद ज़ उलिक, अथबा ओरेस ओखैहुक। हो मिताव ज़ ज्या दाव खेपाए मनी ओज्यालाई तारासोक।

### उयुँ हुबो सोनो उयुँ माहुबो ज्या-रीनी

12 फरी जे छुतरालाई है डादाचिज्या। खास गेप्रभुए है ओल्यो पाँ ते माःक, डानी ज़ है डालिज्या। जो उयुँ हुबो गेभाइए ओज्या उयुँ माहुबो उलिकिन फरी नो मेंमा ओरेस लिन्या खुसी ओताकिन नो खेपाए ओज्यालाई तारासोक। 13 हो मिताव ज़ उयुँ हुबो मेंमाए ओरे उयुँ माहुबो उलिकिन, फरी नो खेपा ओज्यास खुसी ओताकिन नो मेंमाए ओरेलाई ताख्यानैवक। 14 नो उयुँ माहुबो खेपा ओज्याए ल्योनी ज़ छैंव ताज्या। हिताव ज़ उयुँ माहुबो मेंमा ब ओरेए

ल्योनी ज़ छैव ताज़्या। हिताव ओमाताव ताकिन निज़ार ब माछैवर ताखेरहो, खाली नोर ते छैवर लिज़्यार। 15 फरी नो उयुं माहुबो, खेपा तादी ब मेंमा तादी ब ओभाःसिकिन्दा घभाःसिज़्याक। नो उयुं हुबो ख्यानैसिउलाई ब फुर्सुल ताज़्या, काराव ल्यो ताकिन गेलाई खुसीस खैद लिन्याए जूनी उखुल्सिउ ची। 16 तछा नरेलाई परमेस्वरए ओपाँत नरैधुज़्याक्या, नँ काता नसैए? हिताव ज़ नँ खेपाए ब नज्यालाई तछा परमेस्वरए ओपाँत नरैधुज़्याक्या नँ नमासैए।

कितावल जेल्यो होल ज़ लिद ओसेवा दान्या

17 खाली परमेस्वरए जो मितावल खुल्द खतैद नैचिउ, हो मितावल ज़ बाच्यो। पो पोडाव मन्दलीरालाई हैज़ डारादोज़्या। 18 क्याल्न्या सरैस ताधुव मिँ परमेस्वरए ओपाँत उहुकिन नो मिँ क्याल्न्या सरैस माजैसिउ मिताव ताजैसिक। हो मिताव ज़ क्याल्न्या सरैस माजैसिउ मिँ उहुकिन नो मिँ क्याल्न्या सरैस ताजैवक। 19 नो सरैस जैसिन्या माजैसिन्या ओलेखा माले, परमेस्वरए ओपाँ दान्या वाज़ लिज़्या। 20 परमेस्वरए ओराखुलो बेलाक किताव याल्यो हिताव ज़ उलिरक। 21 परमेस्वरए ओपाँत उहुव बेलाक छुतए ओबाँदा ओल्यो ताकिन नोए उजूनी सोगो तादोवक, नल ज़ उलिक। खाली नो मिँ ननी हाइसिउ ओदैकिन नो मौका तारासोक। 22 काराव ल्यो ताकिन परमेस्वरए ओपाँत जेहुव बेलाक छुतए ओबाँदा जेल्यो ताकिन परमेस्वरए ल्योनी रास्सिउर जेताज़्या। हो मिताव ज़ परमेस्वरए ओपाँत जेहुव बेलाक सुए उधूँल ज़ जेमाल्यो ताकिन अबकिन ख्रीसए उधूँल जेताके। 23 है जैद जेलाई ख्रीसए उजिउ झाःद ओलैःचिउर जेतावए छुतए ओबाँदा ताजैसिच्यो। 24 डानै डामेर, जे परमेस्वरए ओपाँत जेहुव बेलाक कितावल जेल्यो, होल ज़ लिद परमेस्वरए ओसेवा दोचिके।

बिह्या मादोतावर

<sup>25</sup>ज्या मादोताव, रे मादोतावराए जूनी है डादाचिज्या। आव पाँ गेप्रभुए ल्योनी ते माःक। हैदी ब डा डाल्योनी ज़ डासमूजैचिज्या। खाली परमेस्वरए डाल्योदा उयुँ ओनावनी आव डापाँ युँ हुबो पाँ ज़ लिज्या। <sup>26</sup> आज्यालकाव इताव धो सहिउ दुखर गेक्याँत याहुरिज्यावए बुरू जे किताव जेलिज्याव हिताव ज़ जेलिकिन पाथ लिज्या। <sup>27</sup> खाली बिह्या जेदोधुव ताकिन जेज्यारास ताभाःसिच्यो। जेमादोताव ताकिन बिह्या दाव तापैच्यो। <sup>28</sup> हैदी ब जे खेपाराए ज्या जेदोदी ब पाप ते माले। हिताव ज़ बिह्या मादोताव मेंमाराए रे यादोदी ब पाप माले। खाली बिह्या दोज्यावराए आव जिउत दुखर दैर सैं लिद डा जेलाई ननी जोगोइव डापैज्या।

#### याज्या माल्योराए यातापूज्याव मिताव तापून्या

<sup>29</sup>आव तोबो पाँ ब है डादाचिज्या डानैं डामेंर, खेमून्या बेला नजिक उहुवए आकिनी याज्या ल्योर याज्या माल्यो स्यासोर ओजैसिरक। <sup>30</sup> सोगो दोज्यावर मादोज्याव स्यासोर ओजैसिरक, रेंज्यावर मारेंज्याव स्यासोर ओजैसिरक, लँःज्यावर यास काता ज़ माल्यो स्यासोर ओजैसिरक। <sup>31</sup> आव मानुवातावर याराचलैदी ब लन्था मादोज्याव स्यासोर ओजैसिरक, काराव ल्यो ताकिन आव मानुवाताव जेरँःज्याव भरी अइज़ खेमून्या मान्यादा वाज़ बाज्या। <sup>32</sup>जेलाई आव भरिए जेयुँ आँचा पाँचा घमाजैरक लिद है डादाचिज्या। ज्या मादाव खेपाए 'परमेस्वरए उयुँ कातानी होलाँ जैद डाएके' लिद नदा वाज़ उयुँ थू जैज्याव। <sup>33</sup> ज्या दावए ते 'डाज्यालाई कातानी खुसी डाजैके' लिद मानुवाताव लन्थाल ब लिज्या। <sup>34</sup> नितावए उयुँ नेथोदा ज़ ताज्या। हिताव ज़, रे मादाव मेंमाए 'आव डाक्याँ डायुँलाई कातानी छैव डानैके' लिद परमेस्वरए ल्योदा वाज़ उयुँ थू जैज्याव। रे दाव मेंमाए ते 'डारेलाई कातानी खुसी डाजैके' लिद मानुवाताव लन्थाल ब लिज्या।



35 आव भरी जेजूनी ज़ है डादाचिज़्या। आव पाँरानी जेलाई सुर्द डानैचिज़्याव ते माःक, जेलाई तयुँ जैद्याद प्रभुए ओसेवा दान्यात पाथ पारैन्याए जूनी ची।

मेंमा याज़ा ल्योर

36फरी जेज़ा ल्योरालाई है डादाचिज़्या, मेंमा जेज़ारालाई रे दाव मायाद करस नैन्या माःक। बैस हुद रे दान्याकाव ओतावत, नो मेंमा रे मादाद मातान्या मिताव उलिकिन नोलाई तावैच्यो, दाव एच्यो।\* आल पाप माले। 37 नो मिँए फरी 'डाज़ालाई रे दाव मायाद खुसीस डानैधुया' है लिद उयुँल ओथरैकिन सोनो कर लैन्या पाँर यामाहुकिन, उयुँलाव ओथरैव मितावनी ओज़ालाई ओनैधुकिन चाव ज़ लिज़्या। 38 ओज़ालाई रे जैद्याज़्यावए चाव ज़ दोज़्याव, ओज़ालाई रे जैद मायाज़्यावए झन चाव जैक्यो।

राँदी मेंमार

39फरी मेंमा ओरे ओलेवा भरी ओरेए ओसतत ज़ ल्यो परिज़्या। ओरे उसिकिन वाज़ छुतस रे दान्या उखुसी ताज़्या। खाली नो छींनीकाव ओरे परमेस्वरए ल्योदा उयुँ हुबो मिँ ताव परिके। 40 खाली डा डाबिचारल ते नो राँदी मेंमा रे मादाद निताव ज़ उलिकिन झन खुसी तान्या ले। आव पाँत परमेस्वरए उयुँ ब लिज़्याखेहो ज़ है डालिज़्या।

## 8

अडग्यालाई चरैःसिउ ज़्याव

1फरी अडग्यालाई चरैःसिउ ज़्यावए उजूनी है डादाचिज़्या। तान्या ते आव पाँए उजूनी गे प्राइँए ज़ गेसैज़्या, खाली सैन्या जैसिज़्याव मिँ ते स०ज़्या। नै मेंलाई चिऊन्यानी वाज़ प्राइँलाई तान्या ताज़्या। 2 जोए 'डा ज़ बनै डासैज़्या' है लिज़्या, नो मिँए आःपै सैव परिन्त्या

\* 7:36 7:36 १ कोर ७:३६-३८ ग्रीक खामनी नेथोनी बुझिसिज़्या। छुत बुझिन्या आव ज़ — छोर्याए बिह्या मादाद मातान्या ते माःक, खाली छोर्याए लुज़ालाई निद बिह्या दाव ओपैकिन ओदोवक।

भरी काता ज़ मासैताव । <sup>3</sup> जोए परमेस्वरलाई मया दोज़्याव, होलाई परमेस्वरए सरेसज़्याव ।

<sup>4</sup> है जैद फरी ब तखेप नो अडग्यालाई चरैःसिउ ज़्यावए उजूनी है डादाचिज़्या । गे गेसैज़्या, नो अडग्या काता ज़ माःक । तोबोका तोबो परमेस्वरकिन छुत काता ज़ माले । <sup>5</sup> नाम नमल दै देवता यारादोज़्यावर, प्रभु यारादोज़्यावर बनै कुधु ज़ यालिदी ब, <sup>6</sup> गे गेपरमेस्वर ते तोबो वाज़ लिज़्या, नो गेबाबु परमेस्वर ज़ । ताव भरी ब ओल ओराजैव ज़, गे ब ओल उजूनी जैसिउर ज़ । गेप्रभु ब तोबो वाज़ लिज़्या, नो येसु ख्रीस ज़ । परमेस्वरए ओराजैव भरी नो गेप्रभुनी ज़ याजैक्यो । गे गेदैव अजम्बरी जुनी ब ओल गेप्रभुनी ज़ । <sup>7</sup> खाली मिँ भरिए अडग्या काता ज़ माःक लिन्या चबनै माथरैतार । है जैद रूवा रूवाराए डादाडाव याचलननी अडग्यालाई साचो देवता याजैवए आःपै मामेंःधुर । है जैद अडग्यालाई चरैःसिउ ज़्याव याज़्युकिन 'आव पाँ माचाव ज़' थरैद याखत ल्योर याताव डम्सिज़्यार । <sup>8</sup> नो ज़्याव गेज़्युदी ब गेमाज़्युदी ब परमेस्वरस खैव जैव मादोव, माखैव ब जैव मादोव ।

<sup>9</sup> हैदी ब डा है डादाचिज़्या, आव पाँरानी जोगोइसिद लिच्यो, मानी जे 'जो गेज़्युदी ब ताए' है जेलिज़्यावनी 'आव चाव, आव माचाव' लिन्या माछुतैधुज़्यावरालाई जेराबलेया । <sup>10</sup> निताव मिँ जे परमेस्वरए ओपाँत सैन्या जैसिज़्यावराए अडग्यालाई याचरैःव ज़्यावर मन्दिरल जेज़्युज़्याव उरेंःचिकिन, इन माज़्यान्या ओथरैवलाई फरी ब ज़्याद ओरासो येनलाई फरी ब दान्या ओछ्यास लिज़्या । <sup>11</sup> जे परमेस्वरए ओपाँत 'गे ज़ सैन्या गेलिज़्या' है लिज़्यावराए ज़ चाव माचाव माछुतैधुज़्यावरालाई इन ज़ जेराबलेःज़्या । नो जेराबलेःज़्यावर मनी ख्रीसए उजिउ झाःद ओरायो जेभाइर ज़ । <sup>12</sup> निताव जेभाइरालाई बलेःद, मादान्या याथरैव येनलाई फरी दाव जेरापरीवए ख्रीसए ओक्याँत ब पाप जेदोके ।

13 है जैद डाभाइलाई ज़्यावए ओबलेकिन नोलाई ओबलेज्याव देखा बुरू डा स्याकरी खर्क ज़ कैन्या डामाले।

## 9

पावल बाँदा मिताव ओजैसिउ

1काता डा फुर्सुल ताव माःक रो? काता डा परमेस्वरए ओसाची खतैसिउ माःक रो? काता डा गोप्रभु येसुलाई रँःव मिँ माःक रो? काता जेलाई गोप्रभुए ओपाँत सिजैज्याव डा माःक रो? 2 छुतराए ल्योनी परमेस्वरए ओखतैनाव ओसाची डामारैःदी ब जेनी ते डालिज्या ज़। परमेस्वरए ओपाँनी जेक्याँताव डादोव भरी ओसरेस ज़ रँःज्या।

3डा डाउपर्ट पाँज्यावराए जूनी डाजवाप आव ज़, 4 डा डायेनए जूनी ज़्यान्या ओन्यार दैन्या ओमाताज्याव रो? 5 पत्रुस, गोप्रभुए ओभाइर सोनो उपुर्काव ओसाचीराए यारुँ हुबो याज्यार यास यास यारालाँज्याव मिताव डा ब डामादैए रो? 6 गिन बारनाबासस वाज़ पो पोड परमेस्वरए ओपाँर गिन्रासथैक गिन ज़ छुत येनर दाद डामिन्या रो? 7 सिपाईए ब राजाए ओयेन ओदोक ओल ओज्याव ज़्याद मादोव सानी। एँःलाव येन दोज्याव मिँए ब नलाव ओसै दैज्याव सानी। बेधा गावलाए ब बेधाराए याहारानु ज़्याव दैज्याव सानी।

8आव डापाँज्याव भरी मिँए उबिचारनी वाज़ माःक, परमेस्वरए ओकानुनल ब लिज्या। 9 धर्मसासूत्रलाव मोसाए ओकानुनल ब इताव सर्सिउ लिज्या,

“दाइ झाःज्याव घेंलाई

ओयाःत महला झाःद्यान्या माताए।”

आव पाँ परमेस्वरए घेए उजूनी वाज़ ओपाँव रो? 10 नो पाँ गे मिँराए गेजूनी ब सर्सिउ लिज्या सानी। छुतए ओएँः कीज्याव मिँए ब

‘या:थन डादैया’ लिद कीजूयाव। छुतए ओबाला प्रोद्याजूयावए ब या:थनए उजूनी ज़ प्रोजूयाव। 11 है जैद गे ब जेखार्ल परमेस्वरए ओपाँ वासजूयावरालाई चाहिजूयावर जेल्योनी ज़ दैव परिन्या सानी। 12 गेकिन छींनी जेल्योड परमेस्वरए ओपाँ सथैना हुवराए निताव दैन्या हक उलिकिन गे गेहक ब ल्यो परिन्या ज़।

हैदी ब निताव हक खर्क ज़ गेमाचलैए। बुरू ख्रीसए चाव ओथा कातानी ब तावैसिक लिद प्राईं गेसहिजूया। 13 जे ब जेसैजूयाखेहो, ध्यान झिमल परमेस्वरए ओसेवा दोजूयावए मिँराए याचरै:व जूयावनी ओडासिजूयाव। पुजारीए ब मिँराए थानत याचरै:हुव मारनी उजूं ओदैजूयाव। 14 हिताव ज़ गेप्रभुए ब ओल ओपाँ सथैजूयावरालाई ननी ज़ डासिन्या जैद याएक्यो। 15 हैदी मनी डा ते आव हक भरी डामाचलैए। डा जेलाई, “काराव जेमायॉजूयाव” है डालिजूयाव ते मा:क। डालाई परमेस्वरए ओयेनत सुवाराए तलब मिताव जैद कातार यायाँकिन डासुनी कातानी उरहिरिजूयाव? हो देखा बुरू डालाई सिन्या पाथ लिजूया। 16 परमेस्वरए नो येनत डालाई ओखतैनावए ओपाँ सथैन्या डासुनी नैन्याए जूनी ते मा:क, ओपाँ मासथैद माताए। परमेस्वरए ओपाँ डामारासथैकिन कातानी डायुँ होलाँ ओतारिजूयाव? 17 आव येन डानी ज़ डारूजिउ ताकिन ते जेला रैदी ब ज्यास्खेहो। खाली डा डाखुसीनी माताद परमेस्वरए ज़ आव येनत ओखतैनावए डा दाव ज़ परिजूया। 18 है जैद डा डाजेला ते डा दैन्या डाहक भरी रासूद सुए ल्योनी काता ज़ मारैद अइज परमेस्वरए ओपाँ सथैन्या लिजूया।

19 है जैद डा प्राईं मिँराए ल्योनी फुर्सुल ताव डालिदी ब, कुधु मिँरालाई ख्रीसए ल्योदा जैन्याए जूनी प्राइँराए याबाँदा मिताव जैसिद डाले। 20 यहूदीरालाई ख्रीसए ल्योदा जैन्याए जूनी यहूदी ब डाजैसिके। मोसाए ओकानुन धूँल लिजूयावरालाई ख्रीसए ल्योदा

जैन्याए जूनी नो कानुन धूँल डामालिदी ब कानुन धूँलाव डाजैसिके। 21 फरी मोसाए ओकानुन मासैतावरालाई ख्रीसए ल्योदा जैन्याए जूनी डा परमेस्वरए ओकानुन सोनो ख्रीसए उधूँल डालिदी ब कानुन माल्यो मिताव ब डाजैसिके। 22 चाव माचाव माछुतैधुज्यावराए या किताव याबिचारिज्याव डा ब हितावनी ज़ डारासम्जैके। है जैद डा जुनी ब परमेस्वरए ल्योदा तोबो नेब्लो जैन्याए जूनी प्राईँ मिंराए जूनी प्राईँ ज़ डाजैसिके। 23 आव डादोज्याव भरी ख्रीसए चाव ओथाए उजूनी ज़ डादोज्या। ननी ज़ परमेस्वरए ओपाँताव असिकर डा डाजूँ ब दैन्या डाले।

### बाजी दैन्यात कलँ लिन्या

24 जे ज़ जेसैज्याखेहो, धोंःन्यात दाँजिसिज्यावर बाजी दैन्या ते तोबो वाज़ ताज़्या। है जैद जे ब बाजी दैन्या मितावनी ज़ दाव ताके। 25 फरी घेप्पा घेप्पा खेलल दाँजिसिज्यावर ब झाःसिन्यात बनै कलँ लिज्यार। नोराए खेमन्या बाजी थाँसिउए जूनी दोज्यार, गे ते खर्क ज़ माखेमन्या स्वर्गताव इनाम दैन्याए जूनी गेदोज्या। 26 है जैद डा माताकिद धोंःज्याव सोनो बतासत मुत्का झाःज्याव मिताव डार्सा सैःद डामादोए। 27 बुरू डा नो खेललाव झेंःस्याराए यादोज्याव मिताव डाक्याँलाई काबु जैद काचाबुल दाव डापरींज्या। है डामाजैकिन डा छुतरालाई परमेस्वरए ओपाँत रैज्याव मिँ झन नोराकिन डा ज़ काम मालागिउ तान्या डाले।

## 10

### इस्नाएलीराए ल्योनी चेतावनी

1अ डानैँ डामेरं, जेलाई जोगोइन्याए जूनी तोबो पाँ है डादाचिज्या। भाःक गेसाखा पुर्खार इजिपनी यापुलुसज्याक नो धोइ धोइव बादलस समुन्द्र खालाव घ्याँ बाकेर। 2 नोर बादल सोनो समुन्द्रनी यापुलुसोत मोसाए उमिनत यासछैँसिउ मिताव ताके। 3 नोराए

परमेस्वरए सवाद ओरायो तोबो ज्ञ्याव ज़ प्राइँए ज़्युकेर। 4 फरी परमेस्वरए सपरीद ओरायो बाँचिन्या री ब प्राइँए ज़ ओकेर। नो री पो पोक परमेस्वरए जोरैद ओरायो पहरनी ज़ ओकेर। नो पहर ओल ख्रीस ज़ ओल्यो। 5 नाः चाव दैज्ञ्यावत ब नोराए परमेस्वरए उयुँ कोला कोला जैदिकेर। है जैद परमेस्वरए नो बनल ज़ नोरालाई सोतोर्न्यान याख्याक्यो।

6गे परमेस्वरए ओपाँत हुवरालाई आव पाँ भरी सतैसिउ मिताव लिज्ञ्या। है जैद गे मनी नोराए माँःती माचाव येनदा युँ झाःन्या माःक। 7 नोर ख्वाराए अङ्ग्या पुजा यादोव मिताव ब दान्या माःक। धर्मसास्त्रल ब नोराए जूँनी इताव सर्सिउ लिज्ञ्या, “मिँर बनै थाँतस ज्ञ्याद ओद, स्याद धापा धामें जैसिनाकेर।”

8गे ते नोरानी रूवा रूवाराए यादोव मिताव पातर्या पातर्नी जैसिन्या माःक। ननी ज़ नोर तछात ज़ तेईस हजार सिकेर। 9 नोरानी रूवा रूवाराए यादोव मिताव गेप्रभुलाई जाँचिन्या माःक। ननी ज़ कुधु मिँर घुलराए दाद सिकेर। 10 फरी नोरानी रूवा रूवाराए परमेस्वरलाई गन गन यादोव मिताव ब दान्या माःक। ननी ज़ नो सैःज्ञ्याव परमेस्वरए ओचाकर्या हुद यासैःक्यो। 11 नोराए याक्याँत ताव भरी गे आव संसार खेमन्या बेला दैहुवरालाई चेतावनीए जूँनी सतैद नैसिउ मिताव सर्सिउ लिज्ञ्या।

12है जैद “डा ते परमेस्वरए ओपाँत बनै थ०रिउ मिँ ची” है लिज्ञ्याव मिँ जोगोइसिद उलिक, मानी धलिन्या ओछचास लिज्ञ्या। 13 आःपै ते जेक्याँत मिँराए मासहिधुन्या जाँचर माहुताए। बुरू जेसहिधुन्या जाँचराकिन आगल्या जाँचर परमेस्वरए हुव मारायो। परमेस्वर युँ हुबो लिज्ञ्या। फरी कैताराक जाँचर उहुकिन पुलुसन्या येम याद नो

जाँचराल सहिधुन्या ब जैचिरिज्ञ्याव ।

अडग्या पुजा सोनो प्रभु-भोज

14 है जैद डायुँलाव डानैँ डामेर, अडग्या पुजानी अछतड लिच्यो ।

15 जे पाँ माबुझिधुन्यार जेमाले । है जैद आव है डादाचिज्ञ्याव पाँ साचो सैँ माःक जे ज़ जेयुँल खामिच्यो । 16 प्रभु-भोजल परमेस्वरलाई धन्याबाद चरैःद खुरीनी गेओक ख्रीसए उझीस तोबो झी ज़ गेताज्ञ्या । फरी नो भरेस केःद गेज्युक ब ख्रीसए ओक्याँस तोबो क्य़ाँ ज़ गेताज्ञ्या । 17 नो तोबो भरेसलाई प्राइँए गेज्युवए गे माहोल्या गेलिदी ब प्राइँ तोबो क्य़ाँ गेताज्ञ्या ।

18 इस्राएलीर ब हिताव ज़ यालिज्ञ्याव । थानताव तोबो ज़्याव प्राइँए याज्युवए या भरी ब प्राइँ खैद तोबो ज़ ताकेर । 19 नो है डादाचिज्ञ्यावए ओअर्थ आव ज़, अडग्या सोनो थानत चरैःसिउ ज़्याव काता ज़ माःक । 20 नताव चरैःसिउ ज़्याव भरी परमेस्वरलाई माःक, इया मोंराए जूनी ची । है जैद जे इया मोंरास ताखैच्यो लिद है डादाचिज्ञ्या । 21 जे प्रभु-भोज सोनो अडग्यालाई चरैःसिउ ज़्याव नेथोनी कै जैद जेज्युधुरिज्ञ्याव? नेयेन सुए ज़ मादोधुव । 22 काता परमेस्वरए उयुँ कोला कोला जैद्यान्या रो? सैँ ओलकिन घेपपार गेलिज्ञ्याव?

क्य़ाँए तिर वाज़ दान्या माःक

23 जे ख्वाराए है जेलिज्ञ्याखेहो, “गेलाई कानुननी वैसिउ येन काता ज़ माले ।” हैदी ब डा फरी जेलाई है डादाचिज्ञ्या, प्राइँ येन क्य़ाँए जूनी माले । डाकुइत प्राइँ येन उलिदी ब ख्वा येनए नैँ मेंलाई ब बले-ज्ञ्याव । 24 जो येनत तादी ब क्य़ाँए तिर वाज़ दान्या माःक, नैँ मेंलाई ब चिऊव ताके ।

25 दोकानल थाँसिउ स्याकरी जेलँःक, “आव स्याकरी कैन्या ताके

सैं माताकेमा?” है लिन्या मासम्जिद ज़ लँ:च्यो। 26 काराव ल्यो ताकिन धर्मसासत्रल इताव ससिउ लिज़्या,  
 “नाम सोनो नलाव लिज़्याव भरी  
 परमेस्वरए उमीर ज़।”

27 फरी परमेस्वरलाई उयुँ माहुबो मिँए ज़्यासून्याए जूनी उखुल्चिक, बान्या जेयुँ उलिकिन, जेड़ाक झा:द ओयाचिउ ज़्याव भरी जेयुँल “आव ज़्यान्या ताके सैं माताकेमा?” है लिन्या मासम्जिद घाइ मालिद ज़ ज़्युच्यो। 28 खाली नो मिँए, “आव पुजाल चरै:सिउ ज़्याव,” है ओदाचिकिन नो मिँलाई चाव माचाव छुतैव परीन्याए जूनी नो ज़्यावलाई छु ज़ ताछुच्यो। 29 नो ‘चाव माचाव छुतैन्या’ है डालिज़्याव जे जेजूनी मा:क, नो है लिज़्याव मिँए उजूनी ची। जे फरी है जेलिज़्याखेहो, “गे प्राइँनी फुर्सुल तावर क्यौँए माहाँत लिज़्यावरलाई कै जैद छुतए उयुँलाव पाँए गेलाई कैन्या माकैन्या ओजैसिज़्याव?” 30 जे ते ज़न, “नो ज़्याव धन्याबाद चरै:द गेज़्युकिन नो मिँए गेलाई कातानी गेमिन बले:द ओयासिरिज़्याव?” है जेलिज़्याखेहो। 31 डा फरी है डादाचिज़्या, जे नै तालिच्यो। बुरू जेदोज़्याव भरित, ज़्यान्यात तादी ब, ओन्यात तादी ब, ‘कातानी परमेस्वरए उमिन सघ्यो:द डाएके’ लिन्यानी वाज़ दोच्यो। 32 यहूदीरालाई तादी ब, ग्रीकरालाई तादी ब, परमेस्वरए ओमन्दलीलाई तादी ब, सुलाई ज़ जे यायुँ के:द्यान्या पाँ तादोच्यो। 33 बुरू डा मनी डालाई तान्यानी मादाद पाइँए अजम्बरी जुनी ओदैरक लिद प्राइँलाई तान्याए जूनी सेवा डादोज़्या। जे मनी नितावनी ज़ दोच्यो।

## 11

1 किताव डा ख्रीसए ओदोज़्याव मिताव डादोज़्या, हिताव ज़ जे ब



डा डादोज्याव मिताव दोच्यो।

परमेस्वरए ओसेवा तहस दान्या

2जे डालाई प्राईनी प्राईनी जेचेतैनाज्याव सोनो डापैचिउ पाँर मारासूद जेदोज्यावए धन्याकावर है डादाचिज्या। 3 हैदी ब फरी तोबो पाँ ड़ासमूजैचिज्या। खेपा भरिए गेडै ख्रीस लिज्या, मेंमा भरिए याडै खेपा लिज्या, ख्रीसए ओडै परमेस्वर लिज्या। 4 है जैद खेपाए ओडै कपूद परमेस्वरलाई ओपोंखारिकिन, परमेस्वरए ओपाँ ओरासथैकिन, नो मिँए ओडैलाई बीज्यात जैज्याव। 5 हिताव ज़ फरी मेंमाए ओडै माकपूद ओपोंखारिकिन, परमेस्वरए ओपाँ ओरासथैकिन, नोए ओरेए ओमान नैद ओमायोए ओचेम एन्द ओख्याव मिताव लिज्या। 6 है जैद मेंमाए ओडै माकपूद ज़ ओपोंखारिकिन, नोए ओचेम एन्द ओख्यादी ब ताए। खाली मेंमाए ओचेम ख्यान्या लाज हुव ओतावए बुरू ओडै कपूद परमेस्वरलाई ओपोंखारिक। 7 खेपा फरी परमेस्वरए उसुरूप सोनो उसिडार ओतावए परमेस्वरए ओपाँ ओरासथैक नोए ओडै ताकबोक। मेंमा फरी खेपाए ओसोभा ज़। 8 खेपा मेंमानी सिर्जेसिउ माःक, मेंमा खेपानी सिर्जेसिउ ची। 9 सोनो परमेस्वरए खेपालाई मेंमाए उजूनी ओजैव माःक, मेंमालाई खेपाए उजूनी ओजैव ची। 10 है जैद परमेस्वरए ओचाकर्याराए ड़ाक मेंमाए, “डारेए ओपाँ धूँल ड़ालिज्या” लिन्या सतैन्याए जूनी ओडै ओकबोक। 11 हैदी ब प्रभुए ओड़ाक खेपा ओमातावा मेंमा माताए, मेंमा ओमाताव खेपा माताए। 12 काराव ल्यो ताकिन सिस्तील मेंमा खेपानी ताव ज़, हाःकिन खेपा भरी नो मेंमानी ज़ ताज्यार। हैदी ब गे भरी प्राई परमेस्वरनी ज़ गेसिर्जिज्या। 13 मेंमाए ओडै माकपूद परमेस्वरलाई ओपोंखारिकिन नो किताव जेडमसिज्या? जे ज़ सैच्यो। 14 किताव खेपाए ओचेम बनै ख्योःव ओनैकिन लाज हुव लिज्या लिन्या सुए

ज़ है यामादाचिदी ब जेनी ज़ जेसैज़्या, <sup>15</sup> हिताव ज़ मेंमाए ओचेम ख्योःव ओनैकिन नोलाई ओसोभा हुव लिज़्या लिन्या ब जेसैज़्या। नो ओचेम ओडैलाई कपून्याए जूनी यासिउ लिज़्या। <sup>16</sup> खाली आव डापाँर थैद सुवाराए माभैःद खर्लेसिउ यापैकिन गे सोनो परमेस्वरए ओमन्दलीरास आव चलन वाज़ लिज़्या है डारादोज्या।

### प्रभु-भोज

<sup>17</sup>आव तोबो पाँल ते डा जेलाई डामासमैचिधुइ, काराव ल्यो ताकिन जे परमेस्वरए उमिनत जेदुप्सिक सु ज़ माबनिद झन ज़ जेबलेस्नाके। <sup>18</sup> पाइरानी जेलाई बलेज़्याव पाँ आव ज़ लिज़्या, जे मन्दलील जेदुप्सिक माखैद रूवा तँदा भेलेते रूवा तँदा भेलेते जेजैसिज़्या दी लिन्या डाथैज़्या। नो साचो मनी ताखेहो है डालिज़्या। <sup>19</sup> जे जेखाल साचो मिँ सरैसून्याए जूनी निताव खर्लेसिन्या ब ताज़्याखेहो! <sup>20</sup> है जैद जे प्रभु-भोजल जेदुप्सिक प्रभुए उजूनी ते साचो मारैःके। <sup>21</sup> झन सु सु जेज़्याव रैद ज़्युना जेहुव मिताव जैद नैलाई ब मार्कीद डादा ज़ कार्लानी कुर्लु जेखेमज़्या। है जैद रूवार ते करे ज़ जेताज़्या, रूवार ते ज़्याद ओद मँःद लोलोतोःव ब जेताज़्या। <sup>22</sup> काता, निताव ज़्यान्या ओन्या पो जेझिमक ओमालिज़्याव रो? सै परमेस्वरए ओमन्दलीलाई सोद माथैव मायोःवरालाई लाज मोर्नो जैना जेहुज़्याव रो? जे मितावरालाई डा कै दान्या ओताव? कातानी ची जेलाई धन्याकावर है दान्या? इतावनी जेलाई धन्याकावर है डामादाचिधुइ।

<sup>23</sup>आव पाँए उजूनी गेप्रभुए ल्योनी किताव डादैव, हिताव ज़ जेलाई ब डायचिके। गेप्रभु येसु ओक्योःसिज़्याव छ्याम रील प्रभुए भरेस उकुइत रैद, <sup>24</sup> धन्याबाद चरैःद नो भरेसलाई केःद, “आव भरेस जेजूनी झाःद डायचिरिज़्याव डाक्याँ ज़। आकिनी जेजूनी दाद डायचिउ येन मामेःन्याए जूनी इताव ज़ दोच्यो,” है यादोक्यो।

25 नकिन नो भरेस याज्युवत गेप्रभुए फरी खुरी उकुइत रैद, “आव डाझी ज़। आनी ज़ परमेस्वरए जेस सा:रो बाचा नैद्याचिरिज़्याव। है जैद आव खुरीनी जेओक जेजूनी दाद डायचिउ येन तामें:च्यो,” है यादोच्यो।

26 जे नो भरेस जेज्युक सोनो खुरीनी जेओक गेप्रभु फरी स्वर्गनी ओमाहुवा पै ज़ गेप्रभुए उजिउ झा:द ओयासिउ लिन्या जेसतैज्या।

27 है जैद जोए प्रभु-भोजल प्रभुए उगुन माचेतैद बिनु सोर उज्युकिन ओओकिन, नो मिँए प्रभुए ओक्याँ उझीलाई बीज्यात ओजैवनी ओखत ल्यो थ०रिज़्या। 28 है जैद जे सु सु जेयुँलाई जाँचिद वाज़ नो भरेस ज्युच्यो सोनो खुरीनी ओच्यो। 29 जोए प्रभुए ओक्याँताव याकार माथरैद नो भोज उज्युकिन ओओकिन, नो मिँए ओक्याँत सजा रैज्याव। 30 ननी ज़ जेखाल कुधु याजोरो हुव रूगीर लिज्यार, ख्वार ते सिधुकेर। 31 बुरू गेक्याँलाई गे ज़ गेजाँचिकिन परमेस्वरए गेलाई ओजाँचिसिक निताव सजा यान्या माले। 32 खाली परमेस्वरए ल्योनी सजार गेदैक गेलाई ओलकिन तँदा लिज्यावरास नास तातारक लिद गेजूनी ज़ म-लैसिज्याव।

33 है जैद डानैँ डामेर, प्रभु-भोजल जेदुप्सिक प्राइँ जेमादुमा पै कीसिच्यो। 34 फरी सव्राँसिन्याए जूनी जेहुज्याव ताकिन सु सु जेझिमक जेकरे सै:द हुच्यो, मानी नो सजाल परिन्या जेले।

उपुर्काव पाँर डा डाहुवत वाज़ है दान्या डाले।

## 12

### छैँव पुरूसनिकाव बरदानर

1 अ डानैँ डामेर, परमेस्वरए छैँव उपुरूसए ओयासिज्याव बरदानए जूनी तोबो नेब्लो है डादाचिज्या। 2 जे ज़ जेसैज्या, परमेस्वरए ओपाँत जेमाहुद उमी मारै:वलाई दौरैद यालाँज्याव मिताव जेलाई ब आरा उरू मालिज्याव मापाँज्याव अडग्याए ल्योदा ज़

यालाँचिज्याव।<sup>3</sup> है जैद जे मितावरालाई आव है डादाचिज्याव पाँ बनै ओचाहित ल्यो लिज्या। परमेस्वरए छैव उपरूसनी पाँज्याव मिँए खर्क ज़ येसुलाई 'ओफ्याहुव' है मादोव। फरी परमेस्वरए उपरूस मादैव मिँए खर्क ज़ येसुलाई 'डाप्रभु' है मादोव।

<sup>4</sup>परमेस्वरए ओयासिज्याव बरदानर भाँती भाँतिलावर लिज्यार। हैदी ब नो भरी तोबोका तोबो छैव परूसनी ज़ ताज्यार।<sup>5</sup> परमेस्वरए ओयासिज्याव येनर ब भाँती भाँतिलावर ज़ लिज्यार। नो भरी ब तोबोका तोबो गेप्रभुनी ज़ ताज्यार।<sup>6</sup> परमेस्वरए प्राई किसिमलाव मिँराए खार्ल भाँती भाँतिलाव येनर दोज्याव। नो येन भरी दोज्याव ते ओल तोबोका तोबो परमेस्वर ज़।<sup>7</sup> परमेस्वरए उपरूसए गेलाई ओयासिउ सु सु गेबरदानर जो मितावर यातादी ब नो भरी प्राईए जूनी ज़ लिज्या।<sup>8</sup> ख्वारालाई परमेस्वरए उपरूसनी धो बुझिउ पाँ पलासून्या यासिउ लिज्या। ख्वारालाई नो परूसनी ज़ सुए ज़ यामासैताव पाँ सतैद्यान्या यासिउ लिज्या।<sup>9</sup> ख्वारालाई अचम्बलाव युँ हुपून्या सक्ती यासिउ लिज्या। ख्वारालाई नो परूसनी ज़ याजोरो हुवरालाई सगराँन्या बरदान ब यासिउ लिज्या।<sup>10</sup> ख्वारालाई फरी अचम्बलाव येनर दान्या, ख्वारालाई परमेस्वरए उपरूसनी ओपाँ सथैन्या, ख्वारालाई चाव माचाव परूस सरेसून्या, ख्वारालाई परमेस्वरए उपरूसनी छुत छुत खामनी पाँन्या, ख्वारालाई नो पाँए ओअर्थ बुझिद पलासद्यान्या बरदानर याएज्याव।<sup>11</sup> आव बरदानर तोबोका तोबो छैव परूसए ओयेनर ज़। नो परूसए ज़ जो जोरालाई किताव किताव यान्या उयुँ लिज्या, हो होरालाई ज़ याएज्याव।

परमेस्वरए उमिनतावर तोबो क्य़ाँ ज़

<sup>12</sup>किताव मिँए ओक्य़ाँत उखँ उकुइर, ओर्ना उमीर प्राई ताज्यार, हिताव ज़ गे ख्रीसए ओक्य़ाँतावर ब कुधु गेलिदी ब तोबो क्य़ाँ

ज्र गेताज्या। 13 गे यहूदी गेतादी ब, छुत जातलाव गेतादी ब, बाँदा गेतादी ब, माबाँदा गेतादी ब, प्राइँ तोबो पुरूसनी सछैसिद तोबो पुरूस ज्र गेदैवए प्राइँ तक्याँ ज्र गेताके। 14 ख्रीसए ओक्याँतावर तोबो वाज्र माःक, कुधु ज्र गेलिज्या। 15 किताव खँए, “डा कुइ स्यासो डामाल्योए डा क्याँत गनिसिउ डामाले,” है उलिदी ब निताव पाँए ते क्याँल मागनिसिउ माताए। 16 हिताव ज्र फरी नाए, “डा मी स्यासो डामाल्योए डा क्याँत गनिसिउ डामाले,” है उलिदी ब निताव ओपाँए ते क्याँल मागनिसिउ माताए। 17 क्याँत मी वाज्र उलिकिन कातानी थैन्या? क्याँत ना वाज्र उलिकिन काताए सडर्न्या। 18 खाली परमेस्वरए ओल उयुँनी ज्र मिँए क्याँताव भरी सु सु यायेन, सु सु यापो जैद याएक्यो। 19 क्याँतावर छुत छुत ओमाजैव ताकिन क्याँ कातानी ओतारिज्याव? 20 है जैद तोबो क्याँत ज्र कुधु मिनर, कुधु येनर लिज्यार।

21 मीए कुइलाई, “डालाई नँ नचाहित माले,” है मादोधुव। हो मिताव ज्र डैए खँलाई, “डालाई नँ नचाहित माले,” है मादोधुव। 22 इन क्याँताव मागनिसिउ मितावर ज्र बुरू बनै याचाहित ल्योर लिज्यार। 23 फरी क्याँताव माचावल गनिसिउरालाई गेरासमारिज्या, लाज हुव गेराथरैज्यावरालाई इन क्वाए क्वाइद समारस गेरानैज्या। 24 क्याँताव यासोभा ल्योरालाई ताकितर निताव समारस गेमाराँए। खाली परमेस्वरए क्याँतावर ओराजैक लाज हुवल गनिसिउरालाई ज्र यामान नैद्यान्यार याजैक्यो। 25 परमेस्वरए घेपूपा जिम्जार नितावनी ओरासखैवए क्याँतिन तँदा जैसिद लिन्या ओमेला ज्र माले। बुरू प्राइँ सम सम समारिसिउ ताके। 26 तोबोए दुख ओदैकिन क्याँ भरी ज्र हर्ज्या। तोबोए इज्यात ओदैकिन क्याँ भरी ज्र होलाँ ताज्या।

27 जे भरी ब ख्रीसए ओक्याँर ज्र। है जैद सु सु जेपो, सु सु जेयेन ब

लिङ्ग्या। 28 परमेस्वरए मन्दलील ब सु सु यायेन जैद याएक्यो। प्राइरानी डात ओसाचीर याजैक्यो। हुकिन परमेस्वरए उपुरूसनी पाँन्यार याजैक्यो। हुकिन ओपाँ पैन्यार याजैक्यो। हुकिन अचम्बलाव येनर दान्या, याजोरो हुवरालाई सगराँन्या, माथैव मायोःवरालाई चिऊन्या, चाव सल्ला यान्या सोनो परमेस्वरए उपुरूसनी छुत छुत खामनी पाँन्यार ब याजैक्यो। 29 ओसाचीर प्राइँ मातार, परमेस्वरए उपुरूसनी पाँन्यार ब प्राइँ मातार, ओपाँ पैधुन्यार ब प्राइँ मातार। हिताव ज़ फरी प्राइँ ज़ अचम्बलाव येन दान्या, 30 याजोरो हुवरालाई सगराँन्या, छुत छुत खामनी पाँन्या, नो पाँए ओअर्थ बुझिद पलासद्यान्या प्राइँ ज़ मातार। 31 खाली जे प्राइँरानी चाव ओबरदानर खिमन्यादा कलँ लिच्यो। अझ होकिन झन चाव तोबो येम सतैद डायचिरिङ्ग्या।

## 13

### मया दान्या

1 डा नाम नमलावराए यापाँ भरी डापाँधुदी ब, डास मया ओमालिकिन डापाँ भरी छ्यार्ल्यांनी छिलिड ताङ्ग्याव छेलामए ओर्गा स्यासो वाङ्ग ताङ्ग्या। 2 परमेस्वरए उपुरूसनी डापाँधुदी ब, सुए ज़ यामासैताव माबुझिधुन्या पाँर डासैंधुदी ब, डायुँ हुबोनी हाँर डाधलैधुदी ब, डास मया ओमालिकिन डा काता ज़ माःक। 3 डास लिङ्ग्याव भरी काता ज़ माल्योरालाई भाःद डाराएदी ब, छुतराए जूँनी डाजिउ डाङ्गाःदी ब, डास मया ओमालिकिन डालाई काता फाइदा ज़ माले।

4 ओमया ल्यो मिँए ते चाव माचाव प्राइँ सहिङ्ग्याव, उयुँ गराँव ब ताङ्ग्या। ओलकिन ओनैँए ओदैवत उमी मातूए, सध्योःसिद मास०ए। 5 ओमया ल्यो मिँए ओसोर माल्यो जबरङ्ग्यासतीलाव येन ब मादोव, ओललाई तान्या वाङ्ग माखिमो, मिँराए जो है यादोदी ब माडैए, माचाव पाँर उयुँल मानैव। 6 असतलाव येनर रँःद उयुँ माचाव

दोज्याव, फरी सतलाव येनर रँ:द उयुँ होलाँ ताज्या। 7 निताव ओमया ल्यो मिँए उयुँ सुहुबो ज़ नैज्याव, प्राइँत आस दोज्याव, प्राइँ ज़ सहिज्याव, मया दान्या खर्क ज़ मारासो।

8परमेस्वरए उपुरूसनी पाँन्या तादी ब, नो पुरूसनी छुत छुत खामनी पाँन्या तादी ब, पाँ भरी सैन्या तादी ब, नो भरी ते तछा खेमन्या लेर। खाली मया ते खर्क ज़ खेमन्या माले। 9 आज्याल बनै गेसैदी ब सैन्या भरी गेमासैताए। परमेस्वरए उपुरूसनी गेपाँदी ब नो पाँ प्राइँ ते गेमाबुझिताए। 10 खाली खेमन्या बेला उहुवत उपुर्काव पाँ भरी खेमन्या लेर।

11किताव डा डादा लुजा डालिज्याक डापाँ भरी, डाबिचार भरी लुजाए युँ मिताव वाज़ उलिज्याव, बल्ल सेर डातावत वाज़ नो लुजा पाँर डारास्के। 12 हिताव ज़ इयार्ल्या जिर्लिव धर्पन गेभाल्सिक चबनै गेडा: स्यासो मारै:ए। हो स्यासो ज़ गेप्रभुए ओगेर ब ओल ओमाहुवा पै इयार्ल्या जिर्लिव वाज़ गेरै:ज्या। ओल उहुवत बल्ल गेलाई सरेसद ओनैसिज्याव मिताव गे ब हो छचाम ज़ ओल ओडा: रँ:द चबनै सरेसन्या गेले।

13है जैद युँ हुपन्या, आस दान्या, मया दान्या, आव सोम्लो पाँ ते खर्क ज़ खेमन्या माले। फरी नो सोम्लोरानी प्राइँरानी घेपपा ते मया ज़।

## 14

परमेस्वरए उपुरूसनी पाँन्या सोनो छुत खामनी पाँन्या

1जे ब प्राइँरानी डात छुतए ल्योदा मया दान्यात कलँ ल्यो ताके। हैदी ब परमेस्वरए उपुरूसए ओयासिज्याव बरदानर ब खिमन्यादा धामा दोच्यो। प्राइँरानी डात परमेस्वरए उपुरूसनी पाँन्या खिमच्यो। 2 परमेस्वरए उपुरूसनी छुत खामनी पाँज्याव मिँ ते मिँरास ओपाँज्याव मा:क, परमेस्वरस पाँज्या। नो मिँए खर्क ज़ यामाथैताव पाँर छैँव पुरूसनी ओपाँवए सु मिँए ज़ माबुझिधुर।

3 परमेस्वरए उपरूसनी पाँज्याव मिँए ते मिँराए जूनी ज़ पाँज्या। नो पाँए पाथ पारैव ब दोज्याव, युँलाई सङ्गेःद्याव ब दोज्याव, युँ होलाँ ब जैद्याव दोज्याव। 4 नो छुत खामनी माबुझिसिउ पाँ पाँज्याव मिँ ते ओललाई वाज़ बनैज्याव। परमेस्वरए उपरूसनी बुझिसिउ पाँ पाँज्याव ते मन्दली भरिलाई ज़ बनैज्याव। 5 जे परमेस्वरए उपरूसनी छुत खामनी जेपाँज्याव ते चाव ज़। खाली होकिन बुरू परमेस्वरए उपरूसनी जेपाँधुकिन ताखेहो है डालिज्या। काराव ल्यो ताकिन नो पुरूसनी छुत खामनी पाँज्यावए नो पाँए ओअर्थ पलासूद ओमाराएधुकिन मन्दलीलाई माबनैधुव। नोकिन बुरू परमेस्वरए उपरूसनी पाँज्याव मिँए ओचाहित घेप्पा लिज्या।

6 है जैद डानैँ डामेर, डा ब जेस निताव सुए ज़ माबुझिधुन्या पाँर डापाँकिन जेलाई काता ची ओतारिज्याव? बुरू परमेस्वरए ल्योनिकाव साःरो पाँ डापलासुधुकिन, सुए ज़ यामासैताव पाँर डासतैँधुकिन, परमेस्वरए उपरूसनी डापाँधुकिन, जेलाई डापैचिधुकिन वाज़ जेलाई तान्या लिज्या। 7 किताव तपून्या बाजार ब, बाँसुलीर सारङ्गर यातपूक यार्गा घेप्पा जिम्ज़ा यामाजैकिन आव गित ओल्यो लिन्या माथरैसिधुइ। 8 लरैँ दान्या झाःसिन्याए जूनी भोंकर तपूज्यावए चावस ओमातपूकिन सिपाईराए आवए उजूनी ओल्यो लिन्या कै जैद यासैरिज्याव? 9 हो मिताव ज़ जेयाःनी प्राइँए बुझिधुन्या पाँ जेमापाँकिन, 'आव ज़ ओपाँज्याव ओल्यो' लिन्या सुए ची ओसैरिज्याव? नो जेपाँ ते बतासए ओलाँव मिताव ज़ ताज्या। 10 आव मानुवाताव मिँराए सु सु याखामर कुधु किसिम ज़ लिज्यार, खाली ओअर्थ माल्यो खाम ते माले। 11 हैदी ब डा डापाँ नोए ओमाबुझिकिन, नोए ओपाँ डा डामाबुझिकिन ओल काताडाव डा काताडाव मिताव ज़ गिन्ताज्या। 12 है जैद परमेस्वरए उपरूसनिकाव बरदानर खिमून्यादा वाज़ युँ जेदोज्यावए जे ब



प्राइरानी डात मन्दलीलाई बनैन्या बरदानर खिम्च्यो।

13 है जैद जोए परमेस्वरए उपरूसनी छुत खाम ओदोकिन होए 'नो पाँए ओअर्थ ब पलास्धुन्या बरदान डादैक' लिद परमेस्वरलाई ओपोंखारिउक। 14 डा छुत खामनी डापोंखारिज्या ल्यो ताकिन नो डापरूसए पोंखारिज्याव, खाली डाबुद्धी ते माचलिए। 15 हिताव ताकिन कातानी दान्या लिक ते, डापरूसनी डापोंखारिकिन डाबुद्धीनी ब डापोंखारिज्या, डापरूसनी गित डागैकिन डाबुद्धीनी ब डागैज्या। 16 मानी जेपोंखारिक माबुझिधुन्या पाँनी धन्याबाद चरै:द परमेस्वरए उमिन बनै ज़ ओथास्क है जेलिकिन, नो पाँ माबुझिधुन्या मिँए कै जैद जेपाँ जोर्घाद, "हैज़ ओताक," है उलिरिज्याव? 17 निताव जेपाँनी धन्याबाद चरै:न्या ते जेचरै:ज्याखेहो, खाली नो माबुझिन्त्या मिँलाई ते फाइदा माले। 18 निताव छुत खामनी पाँन्या बरदान जेकिन डास इन कुधु लिज्या। होए जूनी परमेस्वरलाई धन्याबाद ब डाचरै:ज्या। 19 हैदी ब मन्दलील यादुप्सिक माबुझिसिन्या खामनी दस हजार गोता पाँ पाँज्याव देखा, पाँच गोता तादी ब प्राइँए बुझिन्त्या खामनी ज़ डापाँरिज्या।

20 अ डानैं डामेंर, जे निताव पाँर सैन्यात भाउज़ा स्यासोर ताताच्यो। माचाव येनत वाज़ भाउज़ा मितावर ताच्यो, बुद्धीत फरी छिबोर ताच्यो। 21 धर्मसास्त्रल इताव सर्सिउ लिज्या, परमेस्वरए है लिज्या, "डा जेलाई तादाडावराए याया:नी, याखाम जेमाबुझिधुज्यावराए ल्योनी, डापाँ डासथैचिरिज्या।

हितावत ब डापाँ थैद ज़ यान्या जेमाले।"

22 निताव माबुझिधुन्या पाँर परमेस्वरए ओपाँ भै:ज्यावराए जूनी ते मा:क, माभै:ज्यावराए जूनी सरेस लिज्या। फरी परमेस्वरए

उपूरूसनी पाँन्या ते ओपाँ माभैः ज्ञयावराए जूनी माःक, भैः ज्ञयावराए जूनी लिज्ञया। 23 है जैद मन्दलील जेदुप्सिक जे प्राइँए परमेस्वरए उपूरूसनी सुए ज़ माबुझिधुन्या पाँर जेपाँक, नो बेलाक परमेस्वरए ओपाँत माहुवर मासैतावर नक यालिकिन, “आवर ते बूलिउर ची सा,” है मालेर रो? 24 खाली प्राइँए परमेस्वरए उपूरूसनी जेपाँक परमेस्वरए ओपाँत माहुवर मासैतावर नल याहुकिन नो जेपाँए याक्याँलाई जाँचिद, “गे ते पापीर ची गेल्यो,” लिन्या थरैन्या लेर। 25 हो ताकिन नोराए यायुँलाव पाँर छर्लङ्ग रँःद नामक फुलुप्सिद, “परमेस्वर ते आवरास ची उलिज्ञयाव ओल्यो,” लिद या ब परमेस्वरए ओसेवा दान्या लेर।

### दुप्सिकाव येन

26 डानैँ डामेर, जेदुप्सिक जे कितावर ताव परिके लिक ते, जेस ख्वार भजन गैन्यार, ख्वार पाँ पैन्यार, ख्वार परमेस्वरनी साःरो पाँ सतैसिउ पलासन्यार, ख्वार परमेस्वरए उपूरूसनी छुत खामनी पाँन्यार, ख्वार नो पुरूसनिकाव पाँर पलासन्यार जेलिकिन, नो जेपाँ भरी प्राइँलाई तान्या ओताक। 27 परमेस्वरए उपूरूसनी छुत खामनी पाँन्यार यालिकिन नेब्लो सोम्लोराए वाज़ ओपाँरक, हो ब तखेपूत माःक, पालास पालास ओपाँरक। नोराए यापाँ फरी तोबोए पलासूद ओरायोक। 28 नो पाँए ओअर्थ पलासधुन्यार यामालिकिन नो पाँज्ञयाव मिँ मन्दलील चिम दाद उलिक। उयुँल उयुँल वाज़ परमेस्वरस ओपाँक। 29 परमेस्वरए उपूरूसनी पाँज्ञयावर ब नेब्लो सोम्लोए वाज़ ओपाँरक। उपुर्कावराए नो पाँर थैद ओथरैरक। 30 नो थैज्ञयावराए खार्नी फरी तोबोए परमेस्वरए उपूरूसनी साःरो ओचाहित ल्यो पाँ ओदैकिन नो डादाडाव पाँज्ञयावए चिम ओदोवक। 31 इतावनी ज़ परमेस्वरए उपूरूसनी पाँज्ञयावर पालास पालास ओपाँरक। हो ताकिन ची नोराए यापाँ थैज्ञयाव भरिए

परमेस्वरए ओयेनर सैद यारुँर झेंःन्या ले। <sup>32</sup> परमेस्वरए उपुरूसनी पाँज्याव मिँए परमेस्वरए उपुरूसनी मापाँद ज़ मातान्या ते माले। <sup>33</sup> काराव ल्यो ताकिन परमेस्वर अलमल जैज़्याव माःक, ओयेन भरी मेलास ज़ लाँज्याव।

पो पोड परमेस्वरए उमिनताव लिज़्यावराए मन्दलील यादोज़्याव मिताव, <sup>34</sup> जे ब जेदुप्सिक जेसकाव मेंमार इयाउँ इयाउँ मालिद थैद ओनैरक। नोरालाई पाँन्या यासिउ माले। धर्मसासत्रलाव सर्सिउ मिताव यारेराए पाँ धूँल उलिरक। <sup>35</sup> नलाव पाँर तोबो नेब्लो यामाबुझिधुकिन याझिमक यारेरालाई है ओरादोरक। मन्दलील मेंमार निताव इयाउँ इयाउँ लिन्या लाज हुव लिज़्या। <sup>36</sup> सैं परमेस्वरए ओपाँ जे जेल्योनी सुरू ओताव? सैं परमेस्वरए ओपाँ जे वाज़ दैद जेनैज़्याव?

### तुपैन्या पाँर

<sup>37</sup> जोए 'डा परमेस्वरए उपुरूसनिकाव बरदानर दैव डालिज़्या, ओल उपुरूसनी ब डापाँधुज़्या' है उलिकिन नो मिँए आव डासरो पाँ ब परमेस्वरए ल्योनी हुव ज़ ओल्यो लिन्या ओथरैवक। <sup>38</sup> ओमाथरैकिन ओललाई ब परमेस्वरए थरैन्या माले।

<sup>39</sup> है जैद डानैँ डामें, जे प्राइरानी डात परमेस्वरए उपुरूसनी पाँन्यात कलँ ल्यो ताके। फरी परमेस्वरए उपुरूसनी छुत छुत खामनी पाँन्या ब तावैँच्यो। <sup>40</sup> खाली जेदोज़्याव भरी तहस मेलास दाव ताके।

## 15

### पावलए डादाकिन ज़ ओरासथैज़्याव पाँ

<sup>1</sup>अ डानैँ डामें, डासथैचिउ परमेस्वरए चाव ओथा फरी ब तोबो नेब्लो दोहोरैद डायाचिरिज़्या। जे नो पाँर तीद आःपै नत ज़ जेलिज़्या। <sup>2</sup> फरी नो डासथैचिउ पाँ साचो ज़ जेर्युँल जेरैव ताकिन नो पाँलाई मारासूद ननी ज़ जेबाँचिरिज़्या। मानी ते अनाकल ज़ जेर्युँ

जेसुहुप्के।

3 डा जेलाई डासथैचिक प्राइरानी ओचाहित ल्यो डा डादैव पाँर जेलाई ब डायाचिके। नो पाँर आवर ज़ — धर्मसासूत्रल डादाकिन सर्द यानैजूयाव मिताव ख्रीसए गोपापए जूनी उजिउ झाःघासिक्यो।

4 नकिन नोलाई यागादैव सोलात सैसिद सोके। नो ब धर्मसासूत्रल डादाकिन ज़ सर्सिउ उलिजूयाव। 5 ओसोव छीनी पत्रुसए ओडाक सरैःसिके। हुकिन बाह जना ओसाचीराए याडाक ब सरैःसिके।

6 नकिन तखेपूत ज़ पाँच सयकिन यादाडाव ओपाँत बाजूयावराए याडाक सरैःसिके। नो रँःजूयावर रूवा रूवार आःपै लिजूयार, रूवार सिधुकेर। 7 हुकिन याकूबए ओडाक सरैःसिके। हुकिन फरी ब तखेप ओसाचीराए याडाक सरैःसिके। 8 प्राइरानी छींत डा ओमास मायोःद जर्मिउ\* मिँ मितावए डाडाक ब सरैःसिके।

9 ओसाची भरिनी प्राइरानी जिम्जा डा ज़। परमेस्वरए ओमन्दलीए उखिरी पसिद दुख डायोए ओसाची है लिन्या स्यासो ब डामाले। 10 खाली डाल्योदा परमेस्वरए उयुँ ओगराँवए ओल ओसाची ब जैनाक्यो। डाल्योदा उयुँ गराँद ओयाँव येनलाई फिसको माजैद ज़ डादोज़या। उपुर्काव उसिसराकिन प्राइरानी धामा डा ज़ डादोके। खाली नो दोजूयाव डा माःक, परमेस्वरए डाक्याँताव ओयाँव ओल ओअसिकए ज़ डादोके। 11 है जैद डा तादी ब, नोराए तादी ब, गे गेसथैचिजूयाव पाँ तोबो ज़, जेयुँ हुपूद जेरैव मनी हो ज़।

सिद सैसिन्या

12 तोबो गेसथैचिजूयाव पाँ आव ज़, ख्रीस सिउनी सैसिद सोके। जे रूवा रूवाराए फरी कै जैद “सिद सैसिन्या माताए,” है जेलिजूयाव?

13 सिद सैसिन्या ओमाताकिन ख्रीस कै जैद सिद ओसैसिउ?

---

15:3 15:3 यसै ५३:५-१२ 15:4 15:4 भज १६:८-१० \* 15:8 15:8 ओमास मायोःद जर्मिउए ओअर्थ — रूवा रूवा मिँराए पावललाई प्रभुए ओसाची ताया लिन्या यामाचेतैजूयाव।

14 ख्रीस सैसिद ओमासोव ताकिन गे गेसथैचिजूयाव पाँ भरी ब अनाकलाव ज़ ताखेहो, जे जेयुँ उहुबो मनी अनाकलाव ज़ ताखेहो। 15-16 गे ते झन परमेस्वरए ओपाँताव साची गेयेनल पाजीर ज़ गेथेरिखेहो। जे जेपाँ मितावनी सिउर खर्क ज़ मासोन्या ताकिन ख्रीस ब मासोखेहो। निताव जेपाँए फरी ख्रीस ओमासोकिन गे परमेस्वरए ख्रीसलाई सिउनी सोचोइक्यो है गेलिजूयाव पाँ परमेस्वरकिन तँदाडाव पाँ ज़ ताखेहो। 17 फरी ख्रीस सिउनी ओमासैसिउ ताकिन जे जेयुँ जेसुहुबो अनाकलाव ज़ ताद आःपै जेपापए सजा धूँल ज़ जेलिजूया। 18 ख्रीसए उमिनताव सिउर ब सिउका सिउ ज़ ताखेरहो। 19 गे ख्रीसए ल्योदा गेयुँ गेसुहुपूजूयाव आस आव गेक्याँत वाज़ ओताकिन आव मानुवाताव प्राइँरानी झुकिउर युँ नावज़ार गे ज़ गेताके।

20 खाली ख्रीस सिउनी मासैसिए लिन्या सङ्गा ज़ माले। ख्रीस सिउनी सैसिजूयाव भरिए गेड़ाताव ज़ ताके। 21 तोबो मिँए ल्योनी ज़ सिन्या सजाल बान्या ताके, फरी नो सजानी पुलुसूद अजम्बरी जुनील बान्या ब तोबो मिँए ल्योनी ज़ ताके। 22 किताव आदमए ल्योनी प्राइँ सिन्याल परिकेर, फरी ख्रीसए ल्योनी प्राइँ सैसिन्या लेर। 23 खाली सु सु पाला लिजूया। प्राइँरानी डात ख्रीस सैसिके। हुकिन ओल फरी उहुवत उमिनताव सिउ भरी ब सैसिरिजूयार। 24 नकिन प्राइँ खेमन्या बेला ताजूया। हो बेलाक नाम नमलाव हकर सक्तीर ओपोःस ज़ खेम्द ओल ओराजूया वाज़ रहिन्या ले। नो राज्या ओबाबु परमेस्वरए उकुइत सँपिन्या ले। 25 खाली उसुतररालाई उखँ धूँल ओमाराङ्गाःवा पै ओराजूया ओल ज़ चलैन्या ले। 26 प्राइँरानी छीत ओखेमरिजूयाव उसुतर ते 'सिन्या सजा' ज़। 27 धर्मसास्रल ब इताव ससिउ लिजूया,

“परमेस्वरए प्राईं ख्रीसए उखें धूँल यानैरिज्ञयाव।”

खाली नो पाँल “प्राईं” है उलिदी ब ख्रीसए उखें धूँल नैद्याज्ञयाव परमेस्वर ओल ते ख्रीसए उधूँल ते माले। 28 नो भरी प्राईं ख्रीसए उधूँल याताव प्राईंना ओल ख्रीस ब ओबाबु परमेस्वरए उधूँल ज़ तारिज्ञया। हाःकिन ओज़ाए धूँल प्राईं नैद्याज्ञयाव परमेस्वर ओल ज़ प्राईंए डैताव तारिज्ञया।

29जे है जेलिज्ञयाव मिताव सिउ मिँ खर्क ज़ सैसिद मासोए लिन्या साचो ज़ जेथरैज्ञयाव ताकिन ख्वा ख्वार काराव परमेस्वरए ओपाँ माथैदकाव सिउ मिँलाई परमेस्वरस सखैन्याए जूँनी नो सिउए उजूँनी यासछैसिज्ञयाव? 30 सैसिद सोन्या साचो ओमालिकिन, गे ओपाँ सथैज्ञयावर काराव इताव ओछ्यास ल्यो येनल लिन्या? 31 साचो ज़, डानें डामेर, गेप्रभु येसु ख्रीसए ओड़ाक जे जेजूँनी डामुनी च्याँःसिउ उलिज्ञयाव है डालिज्ञया — डा दिनकाव ज़ सिन्या स्यासो छ्यासल डाबाज्ञया। 32 डालाई एफिससल ला मितावराए याज्ञ्यामहुनाक डा डायेन मिँए ओयेन मिताव वाज़ ताकिन ते निताव दुखर सहिद डालाई काता ची ओतारिज्ञयाव? गेजूँनी सिउनी सैसिद सोन्या ओमालिकिन काताए जूँनी निताव दुखर सहिन्या? बुरू, “जूयाद ओद थाँतस लिकिन ताया, पराःतीदा सिन्या लिज्ञया।” 33 इताव पाँरानी जोगोइसिद लिच्यो। निताव पाँ दोज्ञयावरास जेबारिकिन जे ब बलेसून्या जेले। 34 परमेस्वरए उमिनतावरालाई ज्ञ्यासून्या पाँर थरैद जे ब नो जेदोज्ञयाव पापर रासो ताके। जे ख्वा ख्वार आःपै परमेस्वरलाई मासरेसूज्ञयाव मितावर जेलिज्ञया। निताव येनत जेलाज माहुज्ञया?

फरिकाव गेक्याँ

35जे ख्वा ख्वाराए है जेलिज्ञयाखेहो, “सिउ मिँ कै जैद फरी सैसिद

ओसोरिज्ञयाव? नो किताव क्याँस उहुरिज्ञयाव?” है ब जेलिज्ञया।  
 36 काता जेपाँज्ञयाव निताव? जे ब धुर जेझाःक नो धुर ओमासिवा पै  
 साःरो मापत्करिए। 37 फरी नो गम जील जेझाःव धुर ताम तादी ब, जो  
 तादी ब, नो साःरो हुन्याए ओक्याँ ते जेमाझाःए, नाडग्या ओगेदा  
 वाज्ज जेझाःज्ञया। 38 परमेस्वरए नो धुरलाई किताव क्याँ जैद्याव  
 ओपैज्ञयाव हिताव ज्ञ जैज्ञयाव। सु सु याधुर सु सु याक्याँ ज्ञ जैद  
 याएज्ञयाव। 39 क्याँताव स्या ब छुत छुत ज्ञ ताज्ञया। मिँए ओस्या  
 छुत ज्ञ, बनलाव स्याराए स्या छुत ज्ञ, बाजाराए स्या छुत ज्ञ,  
 डाँःराए स्या ब छुत ज्ञ ताज्ञया। 40 आव मानुवातावराए याक्याँ भरी  
 छुत ज्ञ ताज्ञया, स्वर्गतावराए याक्याँ ब छुत ज्ञ ताज्ञया। याजोबन  
 ब सु सु याजोबन ज्ञ ताज्ञया। 41 हो मिताव ज्ञ निमीए ओज्जगै ब छुत  
 ज्ञ, स्यावैए ओज्जगै ब छुत ज्ञ ताज्ञया। सोरोराए याज्जगै ब छुत छुत  
 ज्ञ ताज्ञया।

42सिउनी सैसिद सोवर ब हिताव ज्ञ। चिन्या क्याँ गमल गेझाःज्ञया,  
 मासिन्या क्याँ परमेस्वरए सोचोइज्ञयाव। 43 ओजोबन माल्यो  
 गमल बाज्ञया, ओजोबन ल्यो हुज्ञया। ओर्सा खेमो गमल बाज्ञया,  
 बनै ओर्सा ल्यो हुज्ञया। 44 नो गमल बाज्ञयाव मानुवाताव क्याँ  
 ज्ञ, ननी हुज्ञयाव स्वर्गताव क्याँ ज्ञ। गे किताव मानुवाताव क्याँ  
 गेदैज्ञया, हिताव ज्ञ स्वर्गताव क्याँ ब गेदैरिज्ञया। 45 धर्मसास्त्रल  
 ब इताव सर्सिउ लिज्ञया,

“प्राइरानी डाताव आदम उस० ल्यो मिँ ताके।”

प्राइरानी छींताव आदम† फरी अजम्बरी जुनी याज्ञयाव पुरूस  
 ज्ञ ताके। 46 ननी ज्ञ रैःज्ञया, गमनिकाव क्याँ डात ताके, नकिन  
 बल्ल परमेस्वरए उपुरूसनिकाव क्याँ ताज्ञया। 47 उस०कताव मिँ  
 आदम गमनी जैसिउ मानुवाताव ताके, छींनीकाव मिँ ख्रीस स्वर्गनी

हुके। 48 गमनी तावए ओथोर गम मितावर ज़ ताज़यार, स्वर्गनी हुवए ओथोर स्वर्गताव मितावर ज़ ताज़यार। 49 सोनो गे किताव गमनिकावए उसुरूप गेदैव, हिताव ज़ स्वर्गनिकावए उसुरूप ब गेदैरिज़्या।

गमे क्य़ाँस परमेस्वरए ओराज़्याल गेमापसिधुइ

50अ डानै डामेर, आव पाँ ब सैच्यो, गे आव मानुवाताव गमे गेक्य़ाँस परमेस्वरए ओराज़्याल गेमापसिधुइ। आव गेक्य़ाँ खेमन्या मान्याल वाज़ गनिसिउ लिज़्या। निताव क्य़ाँस खर्क ज़ माखेमन्या जुनील माबासिधुइ। 51 जेलाई तोबो मोसिउ पाँ सतैद डाय़ाचिरिज़्या — गे प्राइँ गेमासिदी ब प्राइँए गेक्य़ाँ तोसिरिज़्या। 52 खेमन्या बेलाकाव भोंकरए ओर्गा ओथासो प्राइँना गे उमँ:जानी मी चिकलामत ज़ गेक्य़ाँर तोसिरिज़्या। नो भोंकरए ओर्गात सिधुवर ब खर्क ज़ मासिन्या जुनील सैसिद सोरिज़्यार। 53 आव खेमन्या मान्याल बाज़्याव गेक्य़ाँ सोनो सिधुवराए याक्य़ाँ ब खर्क ज़ मासिन्याल ओमातोसिवा पै माताए। 54 नो खेमन्या मान्या भरी खर्क ज़ मासिन्याल ओतोसिउ प्राइँना ज़ धर्मसासत्रलाव सर्सिउ पाँ योन्या ले। नलाव सर्सिउ आव ज़,

“ओल परमेस्वर ज़ झैःसिद,  
सिन्यालाई हारैद नैव।”

55“अब ते सिन्या सजा,  
नमिन ज़ फ्याके,  
नसक्ती ब माके।”

56सिन्या सजा पापनी ज़ ओसक्ती ल्यो ताके। पाप फरी परमेस्वरए ओजैव कानुननी ज़ ओसक्ती ल्यो ताके। 57 हैदी ब परमेस्वरलाई धन्याबाद लिज़्या, ओल गेप्रभु येसु ख्रीसए ल्योनी ज़ निताव सजानी पुलुसन्या येम ब जैद्यासिक्यो। 58 है जैद डायुँलाव डानै



डामेर, जे ग्याल गिल माताद थ०रिद एकतार ज़ गेप्रभुए ओयेन दाव ज़ नैच्यो। जे ब जेसैज्या, गेप्रभुए उजूनी जेदोज्याव भरी जेलाई अनाकलाव तान्या माले।

## 16

पावलए यरूसलेमदा लाँव ओपैज्याव भिती

1परमेस्वरए यरूसलेमलाव छैव उमीरालाई भिती दुपूद्यान्याए जूनी डा गलातियालाव मन्दलीरालाई है डारादोज्याव मिताव जे ब दोच्यो। 2 साताकाव तेखेप उस०कताव छचाम सु सु जेधुवाकाव दुपूद नैच्यो। डा डाहुवत स्योन्त्या ताताक। 3 डा डाहुवत नो जेदुपो भिती यरूसलेमदा लाँन्याए जूनी सु सु जेराखतैरिज्याव डा नोरालाई कागतर सर्द्याद डारापरीरिज्या। 4 डा ब बाव परिन्त्या स्यासो ओताकिन नोरास डाबारिज्या।

हुन्या बन्दोबस्तर

5डा जेल्योदा माहुद ड़ादा माकेदोनियालाव मन्दलीरालाई दैना डाबाज्या। नोरास डादैसित वाज़ जेल्योड हुन्या डाले। 6 डाहुवत जाँवा जेस डालिरिज्या, ओताकिन युँदा भरी ज़ डालिरिज्या। हो ताकिन ओल्द डाबाक डालाई जाँ जाँ जेसघैनाए सै है डालिज्या। 7 फरी जेस निताव तछा नेलाए जूनी काता दैसिन्या है ब डालिज्या। खाली परमेस्वरए जोरैद ओयोकिन जाँवा पै जेस ल्यो डादैकिन ताखेहो है डालिज्या। 8 खाली नो पेन्तिकोस पब ओमाहुवा पै आल एफिससल ज़ डालिरिज्या। 9 आल परमेस्वरए ओपाँ वैज्यावर कुधु ज़ यालिदी ब डालाई परमेस्वरए ओपाँ सथैन्त्या घ्योःव मौका जोरैद नैद्याँव।

10डा डामाहुद ड़ादा जेल्योड तिमोथी उहुकिन नोलाई उयुँ आँचा पाँचा जैद मायाद पाथस नैच्यो। नो मिँ डा स्यासो ज़ गेप्रभुए ओयेन चावस ज़ दोज्याव। 11 है जैद नोलाई सुए ज़ तासोरक। बुरू

नोलाई चावस सघैद डाल्योदा परींघाँच्यो। डा नोलाई ओलस बाव ओनैरास ओयेम चिऊव ज़ डालिज़्या। <sup>12</sup> गेभाइ अपोल्लोसलाई नोरास जेल्योदा परींन्याए जूनी बनै कर डालैक ते आथ पाला भैः ज़ माभैःके। ओताबोत जुनी ब हुन्या ले।

### समजैन्या पाँर

<sup>13</sup>जोगोइसिद लिच्यो, जेयुं जेसुहुबो पाँत थंरिद लिच्यो, माछेःद घ्योःव युँ जैद लिच्यो। <sup>14</sup>जेदोज़्याव येन भरी मयास दोच्यो।

<sup>15</sup>अ डानै डामेर, डा स्तिफनास सोनो उझिमलावराए जूनी तोबो है डादाचिज़्या। जे ब जेसैज़्या, अखैया खन्दलाव प्राइरानी डात परमेस्वरए ओपाँत हुवर नोर ज़। नोराए परमेस्वरए छैव उमीराए यासेवा दान्यात ज़ याजिउ यायुँ भरी झाःद नैर। <sup>16</sup>है जैद जे निताव मिँराए याधूँल लिद यापाँ भैःच्यो। नोरालाई वाज़ माःक, परमेस्वरए ओयेन धामास दाज़्याव भरिलाई ब यामान नैद याराएच्यो। <sup>17</sup>स्तिफनास, फोर्तुनातस सोनो अखाइकसर जे जेल्योनी याहुक डा बनै डारेके। जे जेमालिकाव स्याँब्या स्योंबे नोराए पुरा जैघाँकेर। <sup>18</sup>जे जेयुँर होलाँ जैद यायाचिउ मिताव डा डायुँर ब होलाँ जैघाँकेर। है जैद निताव मिँराए यागुन तामेंःच्यो।

### जेरो दान्या पाँर

<sup>19</sup>एसिया खन्दलाव मन्दलीराए जेलाई जेरो है दाचिज़्यार। अकिलास सोनो प्रिस्किलानिस निझिमकाव दुप्सिज़्याव मन्दलीए ल्योनी ब 'प्रभुए उमिननी बनै बनै जेरो लिज़्या' है दाचिज़्यार। <sup>20</sup>आडाव दाज़्यु भाइ भरिए ब जेरो है दाचिज़्यार। है जैद जे जेल ब मयास\* जेरो दासिच्यो।

<sup>21</sup>आव चिथीत डा पावलए डाकुइनिकाव दस्कत ज़ झाःद डानै, सरेस्च्यो। <sup>22</sup>जोए उयुँ गेप्रभुए ल्योदा माले, होलाई सराप

\* 16:20 16:20 रोम १६:१६ चिऊन्या।

१ कोरिन्थी 16:23

43

१ कोरिन्थी 16:24

ओलागिस्क। अ प्रभु, चाँदो ज़ घुहुनी। <sup>23</sup> गोप्रभु येसुए उयुँ जेल्योदा  
ओगराँक। <sup>24</sup> येसु ख्रीसनी मया डादाचिज़्याव जेक्याँत ओरैःक।  
[आमेन।]

**साःरो बाचा**

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd